

四庫全書

集部

欽定四庫全書

集部

懼軒集卷十三

詳校官庶吉士臣李傳熊

主事臣呂雲棟覆勘

騰錄監生臣范維城

騰錄監生臣卞爾巖

欽定四庫全書

臞軒集卷十三

宋 王邁 撰

古詩

題九鯉湖

原注湖游洋勝境也有九龍運仙人丹竈至今存焉舊傳有巨鰲隱其中

仙人蟬蛻幾經年
山水勝處今依然
長驅九龍叱雷電
高跨九鯉升雲烟
武夷九曲此幻相
靈砂九轉成丹鉛
黃雞白犬得一舐
翩翩高舉紅輪邊
我家去此可三舍
欲識仙竈無因緣
竭來乞取方匕劑
要使凡骨成飛仙

羣仙駢頭顧我語笑指巨鰲在深淵覓丹他日來未晚
且與一釣六鰲連

立夏前五日出郊送春

前回馬首絡青春春我相逢皆故人今朝出門忽失笑
春如五日之京兆鶯癡蝶騷不知愁惟有杜鵑啼到曉
春到園林郵傳哉藤陰次第庇莓苔願春長在人長健
何惜與春歸去來

墨歌寄林明叔

贈君古墨三寸許君知此墨從來處深陽石化幾千年
鋼鐵白經三萬杵昔我得之於異人使我拾襲藏爲珍
我今以半爲君遺物以少貴君勿嗔來歲八月西風裏
我曹忼慨辦行李書囊無底將不去檢點笥中惟有此
用時須留一匕餘丹墀大對要煩渠更有浯溪紀功石
待問君王乞墨書

黃君任景伊西上

杞梓非凡材騏驎非凡馬樸樾不入公翰門賞駿豈無

伯樂者龍泉真實劍焦尾亦名琴張華有眼識紫氣子
期解聽流水音凡物時爲之否泰橫實在道衆所愛十
年讀書得一友送之西征吾意快梅花馨雪花明仙霞
直上逼雲津別君不作兒女語萬卷詩書早致身柳綿
飛榆莢舞軟紅塵中花如雨逢君一笑上青樓破費黃
金買金縷那時君已在瀛洲而我正爲京華游便教後
舉入黃甲早是輸君此一籌

送洪承信儒發西上

詩賦不直一杯水明經談笑博青紫兩石爭如識一丁
長槍得勝毛錐子夫君稽古歲月深雕蟲習素所恥
奮身刀劒亦借徑未能免俗聊爾耳朝來免胄翰墨場
妙發穿楊三昧矢神人換鼻許正郎朱衣點頭相行李
仙霞絕頂雪漫天快上扶搖九萬里明春躍馬白玉京
都人爭看龍燒尾應笑向來點額人方上橋門趨劒履
便須破費千黃金邀儂一醉長安市

送朱典卿履常叅學

文章久矣乏正氣作者付誰傳
位置天庠晚乃得朱君
鐘呂一鳴康瓠棄君看今歲大廷魁
一種風骨何疋羸
吾曹此名未立耳立則萬口須銜枚
君今乘槎問星漢
名已籍仙政何患蠶繭工夫何足籌
龍墀勲業須早辦
作詩贈君當馬鞭梅花送春入冷邊
與君同舍我無緣
天其或者須同年

和毘陵傅知錄送其姪得雋廣童科

渥洼驥子展足長朝發燕都
夕夜郎一腹如椰貯夜光

揮毫落紙爛成章誦書三策無遺忘風采聳動中書堂
伯父一見金玉相聲之以詩鳴鳳凰顧我外氏出義陽
泰與此郎爲雁行竊效昌黎序送童子張期子更閱幾
星霜姓名金榜相頡頏

聞倪尚書赴詔

老倪昔以慙去國時無一語爲王留自從醫國失扁鵲
民之瘼矣矧可瘳滿朝爭慕古爲柔忍恥戴天事世仇
間有一念及王事祇能低頭效楚囚漢家朝得一汲直

淮南即日干戈休夷甫清談倡薄俗坐視平陸沉神州
殘寇六年汙京汴羣魚假息釜中游陛下至仁一南北
天假機會忍不投顧盼左右求所倚張仲孝友吾故侯
亟下一紙起高卧明堂一柱清廟球書生聞詔喜不寐
江左有人吾何憂翻思死者不可生誰爲中興壯其猷
未必軍中有老范且乞王所容居州

賀表兄傅仁仲常後院生男

昔君與我夜對床知君著意選專房爲言東鄰有女寶

胡不貯之芸輝堂君時爲我一慙慙以斗量金買嬌寵
小君有德比孟光不妬不嗔迴盼重懸知仙菓結子遲
三年乃字玉麟兒君家多產渥洼種英物生來骨定奇
莫嫌外家不足數有子端能貴其母舊聞絡秀有伯仁
今見英娘生阿武萱堂一笑顏生春從此含飴日弄孫
他日公侯當衮衮鳳將九子俱青雲犀錢利市人爭覓
我獨流涎不能得假饒此事卿無功不道薦賢功第一

西征艤舟清洲投宿野店夜漏下數刻主媼爲

作粥與同行一飽成詩

君不見淮陰徹侯未得志跨下從人真短氣漂母以食
拱而前心許王孫當富貴又不見文叔宏濟艱難時大
樹將軍身從之一夕相顧有餒色蕪婁之粥甘如飴丈
夫自負不草草剛腸似石那能拗得時要拯萬人饑讀
書肯自謀溫飽諸公兼我非窮人窮途謾爾君勿嗔他
年五鼎享臺饋須記此夕清洲濱

就許宰求雲岫倡和集

原注侍郎
有雲岫堂

昔者杜老夜聽許十詩爲言風騷共推激如何汗青失
其傳覽杜集者爲許惜我曾得倡和之巨編暗中驚喜
拾拱壁泰岳之後無虛人宗派元自一家出馳筒往返
者誰歟雲岫先生詩巨擘文鸞彩鳳迭應酬響撼翠梧
徹金石血駒紫燕爭追馳容與蟻封中徐疾留卷把玩
不忍歸痛快差類愈頭檄應知至寶疇敢私天下有目
皆願識刊之堅梓廣流行作我縣齋大奇特詩名要與
宇宙齊豈比五臺詩卷逸

原注許十五
有五臺詩

自從秋孟授鉞

工跂予望之朝連夕

原本下闕

闕題

原本起脫五句

拙成可抵萬金璧從古至今不偶合如何二妙一時出
僕也若調烏鵲鳴斂翅甘受黃鶴擘自從手授大雅文
孺子低頭拜黃石數韻未足寫形容先生響報何捷疾
兒嬌勝拾隋氏珠母喜如捧毛生檄自憐生長通德鄉
每沐達尊垂異識爲題碑刻墨未乾招入詩盟筆尤特
前無宋艷與班香奄有庾清兼鮑逸歲晚家食誰與娛

持此可慰風雨夕先生自取太勞謙提獎孤寒美多溢
大匠旁觀自汗顏伯樂一顧價增百琴堂聞亦有妙賡
迄遣奚奴爲物色當官多是廢言詩敏手何曾妨霹靂
按此兩首原本誤作一首前首闕尾此闕題并
起處五句因下兩詩俱用前首原韻故並存之

許宰和篇至再用韻謝

陶令東帶對督郵歸來高興潛有激昌黎縣齋飽讀書
自謂此日足可惜二賢詩留天地間千載寶之爲雙壁
當官不妨文字樂似此人物不時出宦海風濤縣爲甚

文書束筭紛莫擘許侯敏手良不難錯節居然逢匠石
寬租農扈享豐登講學如流蘇廢疾筆力重於丈二笈
詩筒敏似尺一檄句中之眼獨心知貽奪陶韓少人識
鄉有達尊性愛士縣榻於堂賞英特

原本闕
兩韻

冰車雪輶

笑鈍遲不爾續題尤富溢窮冬四壁坐無聊渴思一字
車渠百走僕乞取稠載歸底用黃金壯顏色祇恐天上
六丁聞一夜取將煩霹靂

陳侍郎見激字韻和以見寄復用韻謝

先生德量萬頃波撓之不濁無湍激文章亦如萬斛泉
酌之不竭何慳惜滄浪亭下把釣竿雙筆堂前看蒼壁
時逢問字客及門倒屣不要人扶出飲酣戲索烏欄書
吟罷笑拈麟脯擘一詩直萬雞林金衙官坡谷奴劉石
得者須熏玉麝香覽而玩之痊百疾堂堂元帥坐詞壇
餘子誰堪承羽檄許侯端是忘年交具眼朗然爲賞識
雲岫詩卷盈錦囊自欣邂逅有勝特先生筋力似裴公
侯比香山才更逸涼臺燠館富唱酬如見古人今之夕

斐然小子謾成章所美信美安敢溢有來珍翰費吹噓
展閱再三感千百當偕巨帙什襲藏寒谷先期有春色
新年更擬打作碑薦福莫教雷霹靂

贈術士陳談天

我生之辰日在亢斗牛之宿晦無耀獨有首尾二競星
角立昴氏爭繫標一生奇蹇良苦之已分青雲輸年少
每逢星史說經躔探手止之頭屢掉談天一日叩齋扉
信口陽秋天下妙數靈不用著草占機祕時將道眼照

玄中巧奪君平胎聖處深入渾沌窾俗人籌星亂如麻
蠡測管窺工竊剽聽君談唾如秦青字字宮商合腔調
如何孤身無所賞萍梗風波任浮漂正緣苦泄造化機
真宰忌之神所謂方知多技故多窮凡事皆然君莫笑
雖然知己豈無人試往京城謁權要一絲莫久牛蹄灣
滄海六鰲待君釣

贈郭五星

五陵豪家輕薄兒驕傲成癖不可醫揮金買笑紅塵市

老死不曉寒與饑囊螢案雪單貧士杯水生涯北窻裏
途窮山鬼恣揶揄命壓人頭提不起郭君昔從先人遊
萬丈壯氣橫高秋天無老眼不見錄匆匆白了少年頭
一日訪余道艱窶杯酒未闌淚如雨襟著有術金不換
鶉衣百結無人補我聞君語鼻亦酸誤身直是坐儒冠
英雄未遇隱於卜時人莫作白眼看

贈川官五星先生

談星之士如星密得似川官萬之一牙籌到手疾如飛

口觜翻瀾眼波碧相逢笑問雌甲辰掀髯慙思曲江春
自憐蹭蹬負歲月敢謂渠儂許可真明時取士非唐比
忠臆不空人所恥三籌交臂輸少年只較劉蕡差勝爾
川官重來話榮枯聲言溫飽非所圖他時散漫遊江湖
未省還能訪我無

讀誠齋新酒歌仍效其體

先生出竒作新酒自作自歌自爲壽酒徒若欲舉吾盃
先挽天河濯渠手誰知先生詩更竒刊落陳言付芻狗

俗人欲誦先生詩先吸天漿漱渠口古來作酒稱杜康
作詩只說杜草堂舉世無人傳得方奄有二杜惟一楊
先生此味誰能嘗却曾見此糟蟹黃一片入口風韻長
餘子祇慕大官羊天公生我太遲後不作先生牛馬走
低頭乞取酒百壺燕下先生詩萬首先生騎鯨上天遊
問著許儂知味否

蔡實甫能酒而道中無可口者見其叨噪成長
篇戲之

吾祖方平至君家絲麟談笑酌流霞麻姑綽約時在坐
癢處思得姑爪爬我今與君豈其喬彈指又經千百歲
文采風流今尚存仙風道骨知誰繼今宵月明明更多
有客無酒如月何唇乾吻燥甚背癢安得玉壺瀉金波
白玉樓臺月如晝屋貯阿嬌車載酒元君再會儻可期
我當起舞爲君壽

送陳君保作詰赴廣漕

昔我與君俱妙齡同時充貢鄉曲英君携令名遜伯氏

天性好義甚好名薄俗斗粟有德色君視名第鴻毛輕
此事今無古亦少百鳥羣中孤鳳鳴老天相知苦不早
囊書匣劍猶書生累年文屋提鐵騎共我犄角參齊盟
我于再戰偶得雋君雖屢衄無弱兵長鬚忽持雙鯉至
短褐欲訪五羊城紅粉蛛絲期已近金灘鵲鵲眼偏明
知君圖南非左計九萬扶搖第一程疇昔韓蘇行脚處
一草一木被光明鯉魚久出海若避白鶴詩留泉石清
葛仙丹井未湮沒伏波銅柱餘崢嶸君行窺奇摘海異

澆沃磊塊氣愈盈閩士南征可車載間有鐵中夸錚錚
商瑚夏璉只君是此寶豈久道邊橫吹送鶚書風借便
殿前奏賦摩空聲當家魁相衣鉢在會趾前美大門閤
壽母一笑春生頰繡輿錦誥來將迎牽衣兒女莫惜別
爲君爲親在此行計程何日到庾嶺梅花雪片飛瓊瑛
魁占羣芳差易耳相期心事在和羹

二十韻寄潮陽宰余君實日華

昔日潮守有昌黎恩波萬頃橫鯉溪五百年後得余令

棠陰上與韓本齊故家縣譜熟展布耒然牛刀優割雞
膏年已報三異政節愛堂扁煥新題手摩民瘼心隱痛
藥石其肯靳刀圭老農終歲不識吏廢疇荒隴皆鋤犁
邑有豪俠擅武斷鋤筍告訴來髭覲仁者之勇一發露
愛苗亟欲芟稗稊誰爲鼠輩巧道地周道如砥生疾藜
公車未采輿人誦端士先爲橫議擠朝中有語稍辨雪
言者愕立惜噬臍侯朝聞命暮就道束書之外他無齎
出屢五日纔百里截鐙卧轍相提携乞留有狀白府治

辭以君命安敢稽香花隨來推不去丁壯遮拜嬰孩啼
不知朝廷聞得否天下貪吏濁如泥毀譽失真例如此
狂瀾既倒誰能隄書生有舌不善佞今拜東野頭須低
詩成翻恨天門遠何人乞我青雲梯

謝陳尉宏父惠潮陽蕉絲碑刻因求宿諾韓文
寒儒食貧面四壁更苦春寒寒到骨故人天未有書來
不寄綈袍寄絺綌感君高誼挾纊溫况有石刻華吾軒
何時揩拭眵昏眼待看昌黎玉潔文

邵武山人楊壽卿臨別索詩

楚峯之下有地仙，隻手把握山水權。
青烏白鶴去不返，此郎高舉拍其肩。
年來海內稱絕倡，眸子瞭然通意匠。
巧尋地脉如良醫，妙畫山形如智將。
高談曾折王侯腰，湖海隨身一酒瓢。
僕痛馬瘦醉不省，術工鬼妬窮之招。
龍眼豹睛休分別，螻蟻侯王等同穴。
待儂回向心地初，林下班荆共君說。

讀坡詩

先生詩筆觀天巧國中往往無曹鮑一讀快如檄愈頭
抓癢底用麻姑爪千古詞林有若人誰復庸中誇佼佼
當年流落見丹心懸知世道終難拗玉堂豈不願公留
羣吠其如尨也狡出入風波千萬里葛巾野服混蠻獠
饑來隻字不堪煮豆粥一盂粗可飽跋前疐後竟何成
贏得清名占箕昴與公同時富貴人名字磨滅隨蟣蚤
丈夫當爲不朽計方寸莫被饑寒擾

題致爽軒詩

明珠積斗滿金羸時人逐臭如蒼蠅公子一過掩其鼻
長物何足汙吾清蕊珠午夜鳴玉珂五侯門下肩相摩
公子有腰不可折勢利不屈惟高歌試問公子何所欲
有山數笏青如玉我將致之襟袖間山若肯來吾願足
淵明靈運不再生青山白雲誰主盟佳哉公子有具眼
終日看山無俗情我來假館翁不靳山下梅花動詩興
一語刮破俗子盲兩字清高用不盡

贈林蘄

原注善表背

丈夫惟窮不可諱僕妄于人真短氣一技能精百不憂
有功翰墨尤足貴林生家世本業儒讀書不利改傭書
計窮未肯與書絕又學裁翦無黏糊就中頗得三昧訣
翻騰碑畫更奇絕持此可療寒與饑十指便當張儀舌
昔我于生義理明以我之困知生貧我今一字不堪煮
生猶有技可資身鄴侯書堂高不過好事人少俗人多
把筆贈生以此歌有釵無廩奈生何

謝政府饋金

大廷昔日曾空臆時論忌人太疎直名公正色力主盟
寘之甲科免居乙殿廬今日忝校文甘言如飴心所嫉
或者欲植桃李恩慨然爲下雌黃筆

原注時權貴私囑
一入欲寘甲科余

不從

頭方直是不能圓入險固應陰下石我公天下盡門

生僕荷知音心感激幸無臧墨辱門牆猶免語人顏發
赤感公具眼照人才墜履遺簪猶愛惜臨歸多謝饋兼
金何日能爲還白璧

臂鷹詩

東鄰年少養鸛鷹置之臂上拊玩頻呼來麾去性日馴
癡兒偶然見之嗔鷹張利爪拏兒身眇其隻目視主人
主人初以鷹爲戲一日悔欲自斷臂非我類者其心異
吾賦鷹詩所以志

啄木鳥

啄木復啄木汝啄抑何毒千株萬株端明松五月六月
來清風木于汝何惡朝朝暮暮啄勸汝利觜宜少停戕
木之生吾忍聽已有弋者在後亭微蟲初何識亦能對

以臆天子愛元元宵衣念艱食連年值未饑窮閭多菜
色縣官急督租吏饕餮需索啄木比刻木何者爲可疾
木生與民生何者爲當恤可彈者不彈爲我謝彼弋

送莆守趙孟堅汝固司舶溫陵

紹定庚寅夏四月侯來守莆時羣盜蜂起剽臨汀
輟昭武鎗劒之順昌將樂擲泉之永春德化踣漳
之長泰龍岩莆距賊壘三舍而近人惴惴不寧居
侯明號令布方畧事有切於保障者不吝費不愛

力治下有惡少乘間竊發者斬以徇懸金募得賊
間謀數十人夾以砧斧膾醢之盜聞風不敢犯境
報政之五月被旨移鎮溫陵莆人欲借留不可得
遮道祖餞者相屬水仙王某作爲歌詩拜于馬首
以明稱莆氓之志云

君不見有唐元結守舂陵湘湖一道盜縱橫獨元所治
一無犯鎮撫孤壘如金城又不見祁公曾作乾州牧移
鎮鳳翔何迅速兩州之民境上爭先把州麾後鈞軸使

君來莆全似元精明旗幟張轅門威風惠雨相廟拂鼠
輩不敢闖吾藩使君去莆仍似杜截銓遮留喧道路吾
莆赤子方有依泉何爲者爭吾父我將軟語勞莆人此
地幸與泉爲鄰刁斗相聞鄰近魯瘠肥不比越視秦使
君風采壓人望莆亦倚泉爲保障渠魁縛致藁街前四
野腥膻行滌蕩長淮以北多風埃社稷正倚經綸才出
平西賊入袞繡一韓一范何人哉書生自顧老無力不
能從公取俘馘願將詩頌紀中興濃墨大字書浯石

惠安賴惟允汝恭乞崇清老椿芳桂四大字爲

賦二詩

混元盤古爲之母汗漫安期爲之友枝條上掛蛻連蜷
劫火不壞其天全雷雨不驚其生厚春秋巧歷莫能知
知我者有蒙莊叟君持此物爲親壽老陳作字光摩斗
人兮椿兮共長久

藥宮仙子携黃雲按之成屑來繽紛百和天香兔爲擣
蟾蜍竊之從月奔色香假合成此樹天上香飄天下聞

花神乞種到后土蒙天一笑移其根知君腰有補月斤
斫取高枝揚遠芬留其賸者遺子孫

代賀崇清陳侍郎正仲讜誕辰

時年八十一

曾夢乘槎泛銀潢不遇張騫遇東方爲言神仙事渺茫
仙府不在白雲鄉丹台幻作儒珍閣蓬島飛來雙筆堂
鶴車千乘集雲軸玉塵萬斛紛雪香是中仙翁永難老
當侍香案近玉皇歸來手握山水印傲睨羲昊輕軒裳
新詩醉墨美無度奄有元白兼鍾王身在巖壑心廊廟

絲鬢垂頷顏蒼蒼與公同時一輩人半隨蒲荻零秋霜
元老崔嵬獨山立歲寒不改雪中篁九月十五夜未艾
長庚伴月光煌煌台星壽星合爲一今夕何夕見此祥
翠娥滿引九仙醞菊英入盞宮樣黃珠明玉潤陪笑粲
起舞璫佩鳴丁當李蹊森森密無縫佳句往往溢詩囊
我於門闌最晚出辦香致禱意則長如聞郡國事方殷
須起老手爲平章待教衛武了相業方許潞公歸洛陽
溫陵萬安橋謁忠惠蔡公祠堂留題

欲知公之忠須誦三諫詩欲知公之惠須讀萬安碑朝
廷得公重天下失公悲騎驄今幾年悠悠人見思今人
愧前脩風流不可追立朝無剛容突梯仍脂韋字民之
廉聲敲扑急繭絲不知富貴有磨滅芳名姱節無窮時
遊子晚出公之鄉兒時斂衽公清規吁嗟九原不可作
每於清夜夢見之所以今日拜公像浩歌出門雙淚垂
和致政林存齋稚圭

東鄰南極老人星音吐洪亮眼晶熒諸郎箇箇佳寧馨

長者早占千佛經仲季銳如及發硎三珠粲爛照戶庭
老人散策傲郊垌健筆哦詩驚六丁仰天高唱雨霖鈴
餐和毓粹養靈扃煉得元身如鶴形文堂縱談耳驚霆
硬語盡作盤盂銘笑渠教誨兒懶聽只今人物混渭涇
賢者聚散類梗萍報復未已况調停我狂畏暑卧風櫺
日夕西望憂朝廷何時乾坤得清寧未信日月長昏冥
不必鋪糟學獨醒不煩餐菊制頽齡支駕皇輿待駉駟
問訊誰坐東西廳老成自昔有典刑尚父須符渭卜靈

贈蕭崇仲致政

昔年鼓篋游膠庠，集英同日瞻天光。
金門初開獸環動，瞳瞳曉日升扶桑。
宮簾高捲開御扇，祥風習習飄天香。
殿庭神麗冠劔肅，巍巍玉几臨中央。
銀袍七百趨龍尾，拜恩稽首心歡康。
晚從銀臺出廣陌，寶鞍快馬爭騰驤。
團司涓日叙黃甲，義比天倫鴻雁行。
瓊苑宴開慈惠浹，宸章寵錫歌明良。

原注：賜詩有相求自昔屬明良之句。

後來相繼隨宮牒。

東西南北遙相望，萍開風轉有時合。
邂逅一見難預量。

非才叨竊愆咎積自顧補報無毫芒朝廷寬大不終棄
領郡尚得來南漳下車問政訪耆舊知公辭榮歸故鄉
神武衣冠已久掛冥鴻羽翮方高翔遺賢雖爲明時惜
承顏獨喜私願償共驚歲月何飄忽相對鬢髮俱滄浪
至言不吝揮玉麈妙句屢蒙開錦囊已歎高風激貪懦
更敦雅契超尋常區區感慰豈有極聊寫一二成短章
蕪音不足繼真作讀過幸勿留巾箱

春月白鶴吟寄魏鶴山

鶴去兮梁陽雪衣兮相羊啄芳洲兮飲碧湘如青城之
棲兮流矢中傷鶴來兮錢塘朱頂兮昂藏浴太液兮下
建章如九皋之唳兮聲徹上蒼鶴歸兮臨邛之崗嗶朔
風兮立曉霜捫參歷井兮水雲鄉如遼東之返兮華表
飛揚昔者去兮狂梟毒獍相賀乎偃月堂迨其來兮文
鸞祥鳳相得乎漢未央今其歸兮馴鷗狎鷺相待乎午
橋莊善類無依兮若空乎振鷺之行留行無語兮誰扼
乎羣鳥之吭歸去來於鶴何加損兮關世道之否臧有

雁兮南翔翼短兮心長避繒弋兮飽稻梁望胎仙兮天
一方思塞產兮結中腸此仙之壽兮未易量天若祚宋
兮當復來而爲治世之祥按此詩語意是魏了翁既去
官而以詩寄懷也考宋史魏
去官在邁罷漳州通判後故叙次
在此後題聽蛙軒詩語意畧同

題聽蛙軒

原注方審權詩
人也以此名軒

白杜詩人大方家詩兩牛腰書五車高談世事坐捫虱
大扁丈室名聽蛙我見東野低頭拜三年未了聽蛙債
蛙有何好君賞音從龜得蛙自尊大君胡不聽高岡丹

鳳鳴又胡不聽華亭鶴唳聲答云二物不間出吾與此
蛙別有情年來鳳去避矰弋梧桐其棲竹其食有時伸
啄鳴朝陽反被妖鳥豪鷄擊鶴亦遠引歸遼東無緣得
近華清宮縱鳴九皋許嘹唳流矢傷翼愁天翁不如且
聽蛙聲好喚回夢覺春池早縱饒翡翠上茗蘭差勝蛩
螢啼露草王子掉頭曰不然夫君標致如胎仙富家有
子比雛鷄吾道豈得長逋邇不妨少待兩三年一鳴驚
人飛冲天羣蛙蜿蟺何足憐棄置官池任啾喧

栢梁體簡龔少益

青山四面畫圖張
溪流月下鳴湯湯
山之下兮水之旁
有人結茅作書堂
誦聲灑灑流琳琅
使我一聽樂洋洋
應問誰爲師匠良
風流相種如龔郎
天孫付以錦繡腸
一揮十紙爛成章
上與奎宿爭光芒
器成未售此焉藏
吁嗟無地堪翱翔
塵纓自濯歌滄浪
床頭金盡羞慳囊
山鬼吹燈夜恓惶
蚊雷聚噪肆頡頏
仗劍起舞涕泗滂
勸君停劍無庸傷
時平賢路如康莊
鸞鳳引喙鳴高崗

時危此道隘且荒橫寶在道暗無光運行如此休慨慷
男兒立身當自強精金須經百鍊剛膜外榮枯等糝糠
惟忠惟孝不可忘請君傾耳聽柏梁謂余不信來對床

謝阮儒隱爲畫墨梅床屏

畸人平生偏愛奇愛梅成癖不可醫書帶堂前忽見之
相羊不去燃吟髭今夕何夕秋爲期芙蓉映日紅葳蕤
籬菊傲霜紛離披南枝春信未有涯安得此粲對酒卮
元是大阮解作無聲詩寫梅幻相爲娛嬉想當解衣盤

礪下筆時吸取清氣入肝脾先融雪嶺作墨池坐變秋
陽成春暉使我初見渾不疑旋覺風骨全是顏容非恍
如隰支馬上坐明妃縉塵生汗白玉肌又如鷗夷船底
載西子烟波慘淡雙蛾眉雪堂仙去渺莫追補之位置
傳者誰君今此寶世間希芒端寒燠巧推移花神上訴
真宰悲何爲苦泄造化機我有東絹滑如脂裝潢爲屏
作枕幃平章衆畫何品宜笑我嗜好與君相背馳不愛
崇桃積李鬪芳菲請君快掃橫斜竹外枝歲寒心事正

要渠相知

觀獵行

落日飛山上山下人呼獵出門縱步觀無遑需屐屨至
則聞獵人喧然肆牙頰或言岐徑多御者因追躡或言
御徒希聲勢不相接或言器械鈍馳逐無所挾或言盧
犬頑獸走不能刼余笑與之言善獵氣不懾汝方未獵
時戰氣先萎蘭弱者力不支勇者膽亦怯微哉一雉不
能擒虎豹之血其可喋汝不聞去歲淮南間熊羆百萬

臨危堞往往被甲皆汝曹何怪師行無凱捷嗚呼安得
善獵與善兵使我一見而心愜

梅花吟

君不見山前山後雪成堆朔風撼地聲如雷孤根忍死
受寒凍須作百花頭上魁尋春遊子不愛惜馬蹄踐蹂
花狼籍芳姿不肯被消磨飽盡炎涼方結實實成始得
主人知進登玉陛調鼎師那時滋味甜如飴無忘霜風
吹折時

過建陽范氏桂林館見其向日娛賓亭館已屬
他人詩以弔之

桂林當日如春暖花木清妍差可款主人好事玉泉香
行客留題錦囊滿桂林今日如冰寒顏垣壞壁他人管
窮冬莫贈范叔袍過午誰餉子桑飯君不見李家偃月
堂金魚玉珮鳴丁當冰山一倒扶不起月固無恙堂已
荒又不見董家藏金塢翠幕珠幃貯歌舞誰知當時賞
心事不救後來燃臍苦請君聽我吟桂林悲歡成敗更

相尋人生富貴如郵傳古往今來幾桂林

欽定四庫全書

臞軒集卷十四

宋 王邁 撰

近體

讀渡江諸將傳

讀到諸賢傳令人淚灑衣
功高成怨府權盛是危機
勇似韓彭有心如廉藺
希中原豈天上尺土不能歸

賢牧堂

賢牧存遺愛邦人重此祠
典刑前輩幾德政後來誰來

日清泉濯歸時隻鶴隨不須看石碣人口是豐碑

秋榜已揭不寐

寒重難為坐宵長可奈眠老天不解事特地閨今年風
助蛩聲苦霜和月色妍抱衾成百感嚼句憶坡仙

春晚山行問酒主媼以瓶罄告

霜晚寒於臘日中方有春雲頭纔作暮風力又欺人老
犢眠方穩雛鶯語未真停驂謀一醉不酌酒家貧

轎中五言

卯酒工為醉春衫怯曉寒簋與有何味脚力且圖閒得
句點頭笑拈書信手翻僕夫行且止我愛眼前山

次韻調甘內掾

韓掾才情妙吟成苦夜長歌殘如意鐵夢斷合歡床鼓
瑟湘雲暖吹笙嶺月涼舊時雙燕子飛入謝家堂

鷺坑先塋晚歸

詰曲穿荒徑高平見遠山溪乾呈石紫林峭露楓丹不
道歸來晚惟愁句未安片雲真解事放出月團團

夢林清叔

原注林涇字清叔少年有大采吾親友中之至密者死於溺余以大哭之

甚哀每

夢見之

已分幽明隔無端入夢來交情今已矣汝死亦冤哉白骨今何在滄波去不回蛟龍慎勿食之子謫僊才

冬孟駕出親享太廟連日雨是朝大霽都人云凡四次如此矣

玉宇瞳矐曉瓊京畧綽寒紫衣千騎從黃繖萬人看日景新開霽天顏賸有歡駕回春滿殿聖母喜加餐

穀旦街塵淨滿城春意多威儀清警蹕鹵簿扈鑾和從
騎黃金勒回班白玉珂恩榮誰不羨報上合如何

送陳宗諭進叔晉接赴慶元添倅及乃弟泰來

四首

向來寅陛對冷語頗冰人未犯神龍怒先遭老鳳嗔宗
庠隨卻步家食不憂貧公語何嘗泯題輿寵渥新

謾說題輿樂誰知憂國心城狐方伺隙邊馬已如林去
上緹屏最行陳丹宸箴脂韋何足筭百煉是精金

若見青山老煩言僕寄聲入新無好況依舊是狂生國
事今如許庸醫見亦驚不知靈壽杖還解拄天傾

玉季吾心友經行話舊游定知龍有種又快鷄橫秋

原注

丁酉詔曾
請國子舉

對策空丹臆為兄賽一籌功名相迫逐只許

片時留

別劉孟容歲提幹二首

孟容吾畏友春日去朝京蔗境詩多好蓮池官最清坐
誣緣舉將取忌為時名諸老端平歲同詞為辨明

原注
孟容

有蔗境集多佳詩遭
口誣為舉主所累也

吾甫諸壽雋習靜魯靈光有子麒麟種羣孫鴛鴦行此

行青眼衆見謂白眉良通籍何愁晚庭椿樂未央

原注
習靜

乃其尊人壽翁名

彌卻為鄉先生

送林師道似之赴寧都尉二首

造謗端平歲時髦一網空君為梨嶺後名在藥宮中躡

等輕餘子知音邁鉅公莫嫌登第晚試看艾軒翁

原注
艾軒

五十
登第

及物官無小平生志所存一條冰出壑五色棒懸門皂
蓋邦魁彥繡衣鄉達尊儻能念寒畯梅市得春溫

送鄭邛叔珪之博羅尉四首

奇士束科目炯如金在沙孤吟娛草帶幾度見槐花此
舉衣纔綠相看鬢欲華泥金墨猶濕已報熟葵瓜

三十年朋友詩筒幾往還君纔遊宦海我正賦囚山灘
鵝何時下沙鷗鎮日閒升沉踪跡異心事却相關

初宦南游自去年西嘯時豈無風竹興剩有雪梅詩一

尉聊且浼諸公定見知勉旃行好事遠業此其基
是邑經兵火今纔補少痕要教民擊壤毋遣吏椎門文
惠殘碑在坡仙醉墨存公餘勤物色幽興入琴樽

送朱君錫珪尉德化二首

鼓篋游環壁如君最妙齡阿彌開絳幔大阮共爐亭力
學案堆雪收科蟄奮靈莫嫌梅市小有路透青冥

原注
大阮

謂乃叔
履常

隣邑宜初宦輕軒最便家親顏悅萱草詩料有梅花佳

北雙飛鵲夷途萬里驂好培經世業他日步清華

送張能父天定赴瑞州教二首

孟子稱三樂廣文兼有之壽椿齊百歲常棣秀連枝初
筮筠江郡尊為芹泮師英才需教育遠業立鎡基

太學穿楊巧青春斫桂榮心燈傳老宿文印授諸生德
履華嵩重襟期玉雪清君王他日問張姓複其名

送陳汝功起宰永春二首

通了金閨籍須教邑債還尚威民作敵徒善吏容奸世

久無彭澤人今識魯山平生經濟學隨力救時艱

一第垂三紀卿評占得多生涯似韋布談笑試絃歌夏
校士師道春臺民飲和政成行奏最好去立言坡

送劉無競克遜司門赴召三首

吾郡稱多士君家總俊游仲方在閒散伯又襲編修道

與時升降賓隨主去留郵亭還祖餞別意爽於秋

原注仲謂

潛夫克莊伯謂並
傳希醇皆為編修

上了朱轡最催還白玉京兄憐子由別毋勸器之行醫

國言須切謀身策尚平友朋空愛助君自有權衡
更化僅如許和我覺又非邊陲風色惡人物曉星稀國
事迷當局時賢赴急機周釐空憤切不慮歲無衣

送龔少貽北赴汀洲司戶

莊敏與文獻諸孫總俊髦此郎如玉樹初筮即珠曹官
小人能大心清名自高公餘須力學流俗易滔滔

送吳夢大監稅赴潮州圃灣二首

詩禮名家子錚錚早有聲右班卿借徑在計更司征霜

日孤標淨湖山一閔平圖南九萬里此去是頭程
一命官無小意思及物同高風超俗見隻手救人窮官
路梅花白親庭萱草紅賢明尤易事最喜遇南豐

愛女

愛女有家後沉疴未下床問巫羞左道市藥嘆空囊攻
悶三杯酒祈安一瓣香祠山消息好秋杪得還鄉

送良沃州賦得石上松

南山巖石上鬱鬱長青松
樛枝全似鐵老幹半成龍
法

雨流根潤慈雲護影重吾師掛錫處苔蘚近來封

題名士蔡偉叔宣子文集

書眼昏眊久今逢刮膜篋詩編雲岫序文卷水心題富

艷濯江錦清寒印月屢行行遇知己莫歎素無齋

原注雲岫

陳侍郎謹為偉叔作詩序葉水心跋其文

仙水歸程

九鯉湖邊路重來盟未寒折花掇水獻策杖馭風還宦
海波濤惡仙家日月閒前生丹在否歲晚要重九

簡仙遊宰黃瀛甫登二首

黃能琴而
工於詩

為喜雙鳬鳥將臨九鯉鄉民貧嗟轍涸吏橫正鵠張誰
與催賢令速來仁一方茅簷茨屋下延頸望春陽
詩要淵明賦琴須宓子鳴幸哉吾百里行矣見雙清民
瘼需綏撫人才待作成猪肝非我嗜無事累高明

池上歸道間即事二首

一雨惱春思今朝得快晴水波隨日動麥浪受風平野
意來無極籃輿穩更輕抵家何事好稚子亦驩迎

寒食清明近知春不久歸眼驚紅作陣心愛綠成圍宿
鷺立晴瀨栖鴉掀夕暉狂遊付年少我已省前非

癡兒

癡兒纔五歲器局稍精明弄筆誇郎罷窺鸞效女兒顧
瞻眸子俊酬答舌頭輕但願身長健看渠骨骼成

聽兒德昨讀書呈邱景實知一教授

我被儒官誤如今又教渠但令識數字不要讀多書帝
憚汲生慙人嫌賈誼疎君看朱紫貴不害腹空虛

山中讀誠齋詩

四海誠齋老千年百卷詩不親門下炙却恨我生遲嚼
句有何味班荆坐許時太羹元淡泊妙處少人知

人日設安簾醺有送菊花一盆四榦直上開花
數百顆不減重陽喜而成詩

弱榦簪頭大鮮葩蠟樣黃携來煩稚子喜甚見重陽不
與浮花並看渠晚節香今宵持供聖一祭動天皇

多病

客問新來況新來病更多憂時添老色慍小損天和不
夢榮華境祇尋安樂窩年豐米猶賤加飯笑廉頗

看蔣玉父有珍灸膏肓

炷艾劇炎火端躬如泰山醫師工指授豎子覺毛寒鐵
脊梁須壯銀河水不乾明知寧忍痛絕慾信為難

歲晚

月映林塘澹風會笑語涼俯窺憐綠淨小立佇幽香携
幼尋新葯扶衰坐野航延緣久未已歲晚惜流光

闕題

文正為州日曾留此段奇靈臺貯清白廢井迸連漪神
護蛟龍宅波通日月池紛紛攫金者不畏此泉知

輓寧宗皇帝章六首

驛報行天下君王棄萬幾鶴翔雲漢遠

原注高宗升遐日都人見有乘

鶴翔雲之異

龍向鼎湖飛祀國天初陷咸池日尚微臨軒思

往事血淚不停揮

帝業親耆定皇圖日靖嘉憂民比仁祖在位邁重華

原注

孝宗二十八年 謨烈詔千載車書混一家最悲行蹕地哀此咽

簫笳

聖化調新瑟仁師慰望霓方還趙全璧旋復禹元圭聲
教恢鄒魯威靈暢女鞵浯碑堪恨處聖壽不天齊

至道天同大清心水不渾六宮行幸少尺宅煉真存厭
代金鑾殿收魂玉帝垣星辰羅上界還奉太微尊

憂治勤宵旰生經爽鼎錮玉卮臨瑞節畫翠愴昕廷草
木秋零落乾坤晝晦冥扶持宗社計列聖在天靈

方啟中興運旋開萬世功人心憂漆室神斷定青宮識
見幾微表安危指顧中孤臣讀遺詔無語泣西風

輓崇清陳侍郎五首

太學修名立甘泉晚節香歸然周大老好在魯靈光餘
慶滄浪水清規壽俊坊典刑今可挹通德合名鄉

幾多居烏府時方豹守闕吾惟操白簡渠謾倚水山六
館為增氣羣儉覺汗顏左遷無愠色青史自斑斑

當軸開邊釁朝紳半說隨公方司獻納言必及安危願

飾湟中備母輕馬邑師當時雖柄鑿今日若著龜

勇退歸雲岫投閒十四年蒲中無此樣地上有行仙健
筆凌坡老清詩輩樂天何人綴遺稿與作不刊傳

小試濟川手東西兩玉虹誰知千載計更在十年中

原注

公歸休十年作會仙安利二橋在邑東西甚宏偉嘗與僕言每旦焚香告天乞延年以成二橋緣後果如願

砥柱老彌壯恩波流不窮向來香一瓣心事與天通

輓平昌戴丞東二首

文錄傳三昧詞壇白雪吟奇才困場屋晚歲綴紳簪所

歷官雖小去思人到今挂冠垂九秩福善見天心
倒蔗入佳境寒花留晚香福田三古刹恩澤四輿梁鶴
化空華表牛眠占吉歲他年青與紫恒塞桂枝堂

輓鄭昂叔珪母蔡夫人二首

鍾秀端明裔來嬪通德家早甘寒水玉晚愛白蓮花樂
施陰功厚回班慶事賒他年龍鳳麓贈典有光華

絳幔談經日熊丸茹苦時屢修堂上拜親炙母中師每
羨萱堂樂今成薤露悲一生同令子共泣蓼莪詩

二月朔日得詩二十六韻

二月方書朔新晴景物饒
今春添一閏是月始元朝
一枕初回夢千官想正朝
橫魚金繫帶鳴騎玉為鑣
歸第無餘事流風競貴驕
歌翻羯羊鼓舞襯鳳凰
簫爛醉東西玉爭妍大小喬
湖山行處樂日月暗中消
軒冕吾何羨巾車隱者招
林泉供嘯傲杖屨足逍遙
砌笋和泥掘盆花引水流
酒爐衣可準茶竈火頻燒
冷眼蛾投燭灰心鹿覆蕉
慣分田父席懶折督郵腰
繙閱書連架賡酬

詩滿瓢只知貧亦好未覺興無聊所恨黃中熾能為鄰
境妖四郊羣嘯聚十室九焚焦舊臘月虧蝕新年地震
搖臺占頻告異塗說洊興妖帶甲多淪沒抽丁困役徭
脩防家買劍巡邏境鳴刀惡少鋒尤烈渠魁首未梟豺
狼行逐逐鴻雁羽脩脩欲訴閭閻苦其如魏闕遼太平
何日見讀報惱孫樵

潘世表來訪臨別贈二十韻

病眼緣春困晨興為子明未應談世故政恐累吾清書

況近何若襟期久不傾春來已多日課辦幾何程我懶
覺成慣人憐太瘦生招窮詩作祟攻悶酒為兵昨著僧房
宿思尋友舊盟時時整行李往往嘆浮萍一動歸歟興
長歌去矣行小軒頻偃蹇分物息經營綠愛彌牆幄紅
驚糝地英感時愁杜宇喚夢賞鷗鷗秩馬來迢遞論文
會合并匆匆為草具鬱鬱有蘭馨如許遽言別深知不
盡情惜花二三月送客短長亭萬事眼前幻一杯身後
名相期在忠孝冷笑付枯榮問學無窮盡文章合老成

倘來聊爾爾所立要錚錚此去逢同社為儂好寄聲有
需新句子此稿不妨呈

春月閱報成詩寄呈方潛信儒孚若

邊耗遽如許廟謨先定無書生良不武夜半亦長吁闕
表成餘幾山陽援正孤黃塵號鬼魅落日走猩貍甲士
疲鏖戰丁夫困轉輸臨淮一帶水諸將萬金軀宛地誰
收馬延秋忌有烏單魂空慘淡曦鬼定擲揄公外英雄
少生來忠孝俱全將身作膽魯以口降胡方喜規模偉

翻為文法拘正塗多植枳公論冷如菰啗雪全初節凌
煙勉後圖未應歌舞地冷眼看侏儒

人日六言五首

功名朝三暮四學問人百已千古今無限卿相方冊惟
著聖賢

誦詩心醉六義讀易夢吞三爻毛鄭寸長我取義文千
載神交

飲食鮮能知味巫醫各有單傳要得胃中活法勿求紙

上空言

六經桑麻穀粟諸子綺縠奇珍常常灌溉胸次久久功用入神

歲月滔滔流水友朋落落踈星載酒誰諏奇字焚香自讀騷經

和書樓叔遇叔題小蓬萊

月砌雲階不染埃疑從天上幻將來一龕儼坐鐘魚呂
二老相從聃與萊丹劑好從金鼎鍊玄關須要玉匙開

他年勲業如粗了待約羣仙笑語陪

歲晚偶題

飲水食蘄坐窮閭旋覺星星上鬢髯
百尺樓中從偃卧
五侯門下任暄炎
寒花最愛香來晚
倒蔗須教未見甜
壽相誰知三甲異
新年願得一丁添

除夜洗硯

多謝吾家即墨侯
朝濡暮染富春秋
為供文字逢青眼
要策功名趁黑頭
濯以清泉塵已蛻
衣之文錦翠如虬

呼童除夜陳豐饌少勞精神併汝酬

寄謝希賢先覺表兄

昔君弱冠我猶兒黃卷青燈茅屋西父對人談稱衛玠
母因客過器王珪別來阻寄尺書鯉夢裏時親日角犀
風快偶然翔短翼不應鴻鵠久卑栖

丁丑同蔣力父東歸至城詩以別之

發軔神皋愁熱甚解驂鄉井得涼多半生相托左右手
一日同收甲乙科老我已鋤年少習期君共守歲寒柯

榮華富貴邯鄲枕惟孝惟忠久不磨

晚過白沙

浪踏麻鞋破曉行林梢猶自帶殘星
氣吞宇宙原無餒心醉功名未覺醒
紅雨無端汙行色白雲知我憶親庭
平生慣作江湖客得酒相看眼倍青

二月十六日到仙水未第前屢得夢

雙轂相催羊胛熟三年方遂鯉湖遊
羣仙笑問來何晚世故相牽不自由
昨夢回思聊爾爾他時稍足便休休

寄聲岩下鵝冠子丹竈何妨為我留

謝仙遊許宰伯調立續題名記招飲二首記乃

崇清侍郎作

栽花次第滿河陽誰結寒根桃李場
鰲在三山驚鼎顛
鳧飛雙鳥費揄揚春風折屐緣聞捷
臘雪開筵重借光
他日明堂需大木
桶糠或得入平章

憶昔琴堂宴士時至今人誦壯行
詩政緣勇氣填然躍
遂竊科名副所期鄉
索摘詞光吐鳳邦
侯塚美穗蟠螭

乞留片石棠陰下要寫春風德政碑

賀許宰伯詡再考

進退韻

宰官才具萬人豪鷄小如何下得刀奏課再經書上上
理繁祇見辦多多錦囊有卷牛腰重裝橐無金馬骨高
欲賀政成憐我懶篇詩付與邑人歌

壽仙遊許宰

原注戊子生
中元後一日

南極秋來光燭天琴堂此夕壽詩仙龐公戊子孰小大
冠相中元相後先製錦從容才有刃嚼丹賦詠筆如椽

交梨火棗君家物從此蓬萊不計年

桃蹊梅塢

疎疎密密自成行共趁春妍鬪曉粧
移得武陵溪上種傳來大庾嶺頭香
玄都道士風流別東閣詩人興味長
喚取園丁勤物色合將何樹比甘棠

和崇清侍郎招飲超燕堂韻

超燕堂開一面春却教寒峻亦充賓
西清班裏推名從南極躔中見老人
草聖已傳碑不朽花神覺與思俱新

鄉邦桃李誰培植直待魁然宰輔真

再和陳侍郎子知丞寄桂香酒新到又令孫司
戶出柑為勸

栢葉椒花未報春陽和先到四筵賓傳觀秀句堪呈佛
諦聽清談太迫人子舍香醪浮甕碧孫枝名菓薦盤新
却將甘旨分寒陋尤見先生愛士真

寒食呈陳崇清

一百五日寒食節八十六翁行地仙曲水飛觴酬勝景

漢宮傳燭憶青烟三春幸自添餘閨雙筆今題第幾篇
俛仰興懷兒輩事先生有樂在壺天

壽陳宗清侍郎

笑把荷囊下紫霄人傳千載鶴歸遼精忠一片馳寅陛
樂事無窮繼午橋垂釣滄浪聽款乃揮毫雲岫賦逍遙
今辰恰紀蓬壺瑞南極橫陳埒斗杓

賀陳侍郎該宗祀告成加封清源郡侯二首告
詞有緬懷耆德養老乞言等語

錦書飛下字如鴉從素詞頭似相麻竣事明裡均雨露
緬懷耆德傲烟霞雞窠佚老精神健燕領宜侯爵邑加
願體乞言珍重意星馳驛騎奏忠嘉

辭封來伴赤松遊判作山中萬戶侯一片葵心天北闕
十行芝檢殿西頭淵洪端靜思言厚拊藉溫存眷禮優
國事多艱耆舊少須公與作濟川舟

再和二首

筆飛鸞鳳墨翻鴉白玉堂中懶草麻得句批風仍抹月

怡神飲露更餐霞公於軒冕浮名薄帝念耆英寵禮加

不衍修齡全晚節洋洋一札聖言嘉

原注皆語
詞中語

壯歲清源曾倦游今朝大郡又封侯身安不用扶鳩杖
骨貴從知應虎頭望闕承恩顏有喜即家問政禮宜優
濟時事業需元老莫遣空橫野渡舟

送鄉先生林獻礪黃石講會

歲暮何時更遠遊劉蕡下第我已羞陽春自古難為和
明月如今肯暗投宿諾不輕連壁友新盟借重扞城侯

九江儻拒黿鼉餌何處堪人下釣鉤

原注時朱上舍
趙監鎮為之倡

賀謝景芳得第四男

每愛君家玉滿塔仙宮今又見琨臺父兮定得鈴旗夢
母也須懷磬石胎羯末封胡知有種復臨泰壯看朋來
林家紹秀如聞此好好來求依樣杯

賀弟綱得男

韓相由來紫府仙微之魯侍玉皇前羨君久矣崇真教
生子居然契道緣料得玉麟親入夢試看銅狄幾經年

不須草草為湯餅刺出犀錢醉四筵

寄鄭龍川子汝瞻巖翁二首一叙別懷一謝惠端

硯

汝瞻當日預文盟七十人中最妙齡別久恨無書寄鴈
夜深猶記案帷螢我叨天幸登科甲子盡心期紹品丁
後會阿蒙須刮目流聲不減國蘭馨

寄我端溪玉一彎文房取友此其端眼中厭看珊瑚樹
掌上忻擎紫馬肝底用千金求國手擬封九錫霸詞壇

他時游宦南州路
免載囊中隻石還

離家

無端輕棄白雲坳
似被梅花喚出郊
歲律堂堂蛇赴壑
宦途役役燕營巢
數更聽雨情何極
憂國懷家睫不交
老了英雄天不管
那堪更被北山嘲

謝何察推鯽鱠

君家一筯萬錢拚
分我銀絲侑客歡
芳餌得來珍丙穴
金刀落處照辛盤
腹腴差迫詩肩瘦
鱗活能生酒面寒

玉手行厨如許巧說教魚婢學應難

別戴仲實

人生契好不在久一日可當十年游共君三兩夜清話
洗我千萬斛奇愁欲晴未晴雲閣雨臨別惜別車停輒
異時扁舟下瀨渚安道謹勿避子猷

二月閱邸報

聞道邊頭數萬兵倒戈歸我我遺民處降失策國非國
清野無糧人食人關外數州城不獵山陽孤戍草無春

書生憂憤空頭白自有經綸社稷臣

感嘆時事

西風慘淡起愁雲走檄飛書正糾紛
劔器朝方驅冶匠戈船夕又募新軍
馬肥已報高秋警鶴唳那堪中夜聞
我輩憂邊心欲折棘門灞上漫論勲

聞倪正甫尚書遭臺評

人從捷徑博公侯一老堂堂去不留
誰向帝前讒陸贄不令王所著居州修名已立公何欠
直道難行國可憂

安得上方三尺劍為渠斷取佞臣頭

題王雙巖詩集後二首

自是先生標致高
誦詩恍見萬人豪
清如金掌雙莖露
壯似錢塘八月濤
胸次無塵春拍拍
道腴有味樂陶陶
輜軒刻棗傳衡岳
留得芬芳伴楚騷

白首憂時意更長
明言六籍法皆良
先生不竟身前用
有子親傳肘後方
時論無人傳藥石
上醫着眼識膏肓
歸歟活國工夫辨
要續雙巖百世香

寄題盧川容膝軒詩

誰將容膝榜軒楣未見高人心領之綠綺牙籤無長物
名芝芳蔭是佳兒卧看筆架成江夢坐揖爐峰讀楚詞
諸謝風流應未遠盧川今又種清規

送方潛仲入太學


英氣軒軒貫斗牛春風匹馬辟雍遊家庭競秀三株樹
伯仲相交五鳳樓回首白雲添舊感細聽夜雨入新愁
妙年唾掌收科第會有歐公避一頭

石巴山買舟

年來機事付沙鷗湖海萍蓬覺倦遊
千里白雲關我恨一江流水替人愁
快聞飛槳健於馬底問前灘吼似牛
枕藉舟中君莫歎人生何日不虛舟

陳方大弟宏父將省侍潮陽以詩約別

逆旅頻連風雨床歸來蹤跡兩參商
誰知纔隔路三舍不似相從天一方
壺山白認梅將雪潮水黃知菊已霜
便去也須留驛道欲携斗酒話彷徨



欽定四庫全書

集部
臞軒集卷十五

詳校官庶吉士臣李傳熊

主事臣呂雲棟覆勘

騰錄貢生臣劉錫珪

騰錄監生臣黃維

欽定四庫全書

瞿軒集卷十五

宋 王邁 撰

近體詩

七月望後三日西湖會飲酒酣分韻賦詩得荷

字

波平煙霽晚風和船到湖心水沒窩涼絕不知三伏暑
醉酣齊唱八仙歌賞梅洞口隣和靖種柳堤邊憶老坡
魚鑰他時如共直好論舊事捲新荷

紹興戒珠寺讀右軍祠堂碑

先祠石刻摩挲久華胄遙遙企慕勞字古似觀秦急就
詞幽如讀楚離騷不誇絕藝臨池學只羨清風誓墓高
更有山居須問訊擬携方士鍊金膏

原注碑云鍊金膏餐瓊屑

蘭亭故居

弭節稽山樂事多舊聞一一入搜羅臥薪伯業今何在
喬木家聲久不磨可笑兒曹憐野鷺却輸道士辨籠鵝
不因襖帖風流遠千載人誰數永和

闕題

此亭形勝壓東州吳越山川日夜浮萬頃怒濤胥憤烈
一舸明月蠡風流悲鳴華表千年鶴縹渺沙洲數點鷗
倦客來游空弔古那堪更上最高樓

蓬萊閣

原注記序元祐中章崇所作秦
望當其前望鏡湖一帶如綫

歷晉更唐歲月多玩珠龍尚枕山阿絕憐蓬閣題元祐
敢擬蘭亭記永和秦望數尖銜夕照鏡湖一綫暗煙莎
登臨未盡匆匆去奈此千巖萬壑何

飛雲樓

亭前一望水東流更有雄樓在上頭燕子飛來春漠漠
鷗夷仙去水悠悠神交故國三千里目斷中原四百州
日暮片雲棲古樹昔人留與後人愁

按此詩見詩家鼎
齋中永樂大典中

未錄今
補入

寓書吉祥寺臨去親友三人來訪

共指梅花笑裏看詩腸清峭酒腸寬一陽方長知春近
三友同來話歲寒富貴逼人隨世膩身心何日似僧閑

策勲茗椀匆匆去不道樽前欠小蠻

永嘉何子善琴而有詩名一日携二妙見訪求

詩

用進
退韻

山川司馬遊曾慣湖海元龍氣更豪詩眼具時穿月脇
琴聲妙處寫雲和夫君隻手無雙美舉世何人賞此高
料得送窮文已辦雪霜應柰歲寒柯

為余君肅曰嚴母夫人壽

曾向瑤池穩泛槎眼看西母佩飛霞定分天地冲和氣

來匹公侯富貴家
熊膽課兒心苦淡
魚軒錫命世榮華
樽前何物堪為壽
笑指蟠桃幾度花

賀同年林簿同卿龜從新婚

金華門外浥京塵
烏石山前結帨巾
翁壻相看冰映玉
庭闈一笑頰生春
昔言爾爾嫌隨俗
今喚卿卿喜有人
來歲夢蘭叶佳兆
犀錢玉果出娛賓

知君雅志厭奢豪
富貴相尋可得逃
雲母屏間穿雀目
銷金帳下醉羊羔
養生早悟眉為斧
侍立須驚手有刀

老我詩成還失笑膏粱未必勝糠糟

再和王君保定通判韻

覆雨翻雲市道交公持正論息羣嘲風高莫送翎毛短
春暖難生土脈磽攻過每蒙奇藥賜衛生更借好方抄
一陽來復駸駸泰善類傾心望拔茅

和黃遇卿二白韻

晚來雲色半濃淡雲外青山知有無纔出六花誇舞女
又飛一白慰農夫久無人說平淮事空有天生訪戴圖

憂國寸心同皎潔詩肩如鷺更清臞

寄陳起予宗夏二首

原注與余居近一里日相過從近就蔡氏館自携稚子與

俱

道有窮通時屈伸夫君氣槩宜長貧帳前弟子知無幾
膝上郎君最可人首肯儘多聊一笑栗梨見覓莫渠嗔
平生耿耿猶存否五十端能貴買臣

昔共從師未裹頭如今雙鬢各驚秋我無突兀萬間厦
君自昂藏百尺樓風雨苦多時事惡英雄未遇老天愁

相思一夜不成寐早起題詩寄便郵

再和陳起予二首

龍蟄藏身來者伸不妨抱道且安貧
晝眠經筭誇羣弟
夜擁綈袍憶故人
富貴未來招鬼笑
文章太好恐天嗔
安排禮樂三千字
寓目他年許得臣

一誦君詩一點頭
華擒春艷氣凌秋
耳邊厭聽兩蛙部
眼底新誇五鳳樓
花信風殘生酒興
竹枝歌罷動閨愁
蘭亭已近浮觴節
先把歸期話置郵

和後村劉甫紀夢

夢懷諫紙立前廂夢覺披衣起細詳斗粟舊謠仍抗奏
竊金往訓覺增光官緊職一時事令子直臣千載香
報答君親良有日未應垂釣老滄浪

贈郭五星若水叔清二首

雙闕雲仍山澤儒步占小技豈其徒家傳要眇先天學
腹有熒煌列宿圖南海編書希代寶西山一序護身符
二賢出處關天運曾把流年細算無

淮蜀年來殺氣深
中州兵革亦相尋
命懸逆賊狂夫手
憤激孤臣孽子心
人物眇然難倚仗
風濤如此恐胥沉
煩君夜起觀星斗
福德何時吳分臨

又贈劉鐵面五星

劉君腹貯一天星
搜索真機泣六丁
少可舌端無軟語
秘傳肘後有全經
詰盟在昔疑猶夢
詩識如今果叶靈
我亦正為貧作祟
雙眸贏得一番青

送徐子學夢鯉赴梅教二首

九州四海盡同年德行公居一榜先太學何蕃名籍甚
南州孺子道巍然此行莫笑儒官冷立事須還晚節堅
聞說青衿齊引領靈砂九轉待丹鉛

底官得似教官清吏不能塵以道鳴三鱣堂前推老宿
百花洲上見諸生斯文有脉煩珍護何地無才要作成
朝列諸公半知己匪朝吹上玉皇京

和京教李景平

父子才名壓二班儒官咫尺近家山官閒人羨清華選

詩好天開笑粲顏
雌甲一生甘守拙
雄飛千里莫渠攀
骨凡自分仙難做
懶去從人學九還

再和

美人清曉夢催班
老子心清只愛山
晚歲松筠留素節
艷春桃李付紅顏
官廳鶴料猶堪活
援寡龍門莫浪攀
滿眼飛騰霄漢上
誰知倦翼已思還

三和

天上儀隣懶趁班
愁雲苦雨暗湖山
絕憐黑黍紛披穗

空有決明鮮好顏憂國寸心增感慨趨時俗駕倦追攀
幕中幸自文書省詩債無緣久不還

送黃少過非熊守德慶

三紀間關歷宦途蕭然全似一臞儒恥趨東閣墮高節
甘向南州剖左符烟幅不能為健吏清修端可律貪夫
羊城定見荆坡老能為蒼生一出無

送蜀名父之子程剛仲世德擢甲科二首

一誦洋洋大對文便知風骨是西人筆頭重有千鈞力

字面清無半點塵衆羽羣中鳴鳳喙潛淵深處摘龍鱗
大夫出處闕初節歸去携名壽大椿

乃翁勇退急流中家法森嚴在教忠有子清材如結綠
告君直氣貫晴虹甲科更合放頭出時論從來忌臆空
生長殊方同臭味相期不朽是英雄

賀宋兄令子縣尉之望擢第榮還

自從西笑便安排果有佳音天上來縱觀少年親得雋
跨鞍老將幾銜枚歡馳帝里泥金帖喜溢親庭藥玉杯

造物與君良不薄好將陰德厚栽培

用徐編修德夫韻賀其開藩盱江二首

幾年泉谷養靈根一立朝班敢盡言
鑠掣玉麟辭紺殿符分金虎坐轅門
郡條上日新施設民瘼微時預討論
勿鄙嚮來工珥筆只將清淨鎮囂喧

君侯心事即蒼冥諤諤曾同唯唯爭
醫國竒方留後用字民好事及今行
懸知夔禹班難繼且入龔黃傳亦榮
天誘聖衷差易耳正人得路致隆平

壽南宗東巖四首

公是崑臺紫府仙中間一念墮塵緣
小猿驛口霜生甑白鶴巖前月滿船
詩太迫人清似水琴真知我直如絃
年來族老晨星少獨魯靈光尚巋然

杉風蘿月讀書樓藜杖分光夜校讎
雙壁連科天啟齒一珠照座客回頭
金閨通籍傳芳信綵袖稱觥襯雅謳
浪說錦屏家慶好銀潢元有此風流

新陽一信迸黃鐘春到分枝若木叢
天為萬人生李晟

朋來三壽頌僖公松林古佛燒香報粟洞羣仙注福同
欲識東巖長壽相只看台背更方瞳

萬斛龍文筆可扛詩壇坐受百城降文章今代長庚李
福氣前朝戊子龐見說明時延彥勝可令屬籍欠鴻龐
餘干相業公須繼先借雙旌泣是邦

過新蓬二嶺

世路年來熟險巖那堪炎火正宣威足摩青壁頂頭過
心逐白雲天外飛瀑布有聲愁客耳山禽無語怪儒衣

田翁憐我鞋根濕為說林梢已夕暉

閩嶺遙岑

天晴遙見七閩關萬仞丹梯莫可攀鳥度不離青嶂裏
客行多在白雲間玉門遼邈誠虛設蜀道崎嶇只等閑
擾擾路傍名利子軒車南去幾人還

送會之夢龍赴南安尉

儒生十九諳吏事君自胷中有八窓好去提身師長吏

原注時真謹毋泄邇薄鄰邦政聲要重車渠百祥兆須
舍人為守

來鴻鵠雙自笑慳囊無可贖篇詩獨不美羊腔

錢方言巖仲之泰尉尤溪二首

莫作尋常一尉看斯人能大所居官才高不數麒麟桓
氣盛曾排虎豹關初筮事人須以直有心及物莫辭難
此行有一為君賀刺史賢如元次山

原注在太學
嘗詣關上書

一第歸來正黑頭艾軒遺墨費旁搜及仄上日相催迫
銕象通宵細校讎充類所行皆好事立身何患不前修
故家常寶文公帖謹勿逢人便有求

寄婺州趙尚書立夫二首

大雅千年一嗣音人如美玉更良金
清修山澤臞儒樣惻怛河沙古佛心
北闕方瞻台斗踐東嘉還借福星臨
中興宗亮留衣鉢大有蒼生望作霖

憶昔京畿入幕時游從日淺辱深知
每誇得士如溫造幾度逢人說項斯
親見登瀛應擊節近聞去國為攢眉
江干餞別公先至洪魏諸賢鼎鼎來

游溫陵得未第之士四人作四愛詩

贈茂功茂叔

吾愛清源徐茂功，聲名捷出日方東。
高旂下首紛餘子，屈指論心幾鉅公。
我定斯文宜館閣，人言科目滯英雄。
直須一舉魁天下，方快鵬程萬里風。

贈養仁若春

吾愛清源顏養仁，筆端有力重千鈞。
奇才自合巍收第，他巧何妨且進身。
我老無能惟喜士，君名若出定驚人。
元宵相聚過寒食，不污東風一點塵。

贈順夫履信

吾愛清源陳順夫妙齡足跡半江湖三湘舟裏詩成束
百尺樓前酒滿壺科目宜淹真俊傑世間誰數飽侏儒
長安貴宦門如市還有樽前此客無

贈來叔泰來

清源吾愛陳來叔紫帽家聲藹月評苦學心能通造化
擇交足不出門庭人知長宋名先弟誰識子由文勝兄
聽取措紳傳好語可軒後有兩魁星

原注可軒校
書為鄉先生

簡宗弟無逸稼主簿

揭來纔是早春時
過眼園林轉子規
看絕交書君介癖
讀離騷賦我狂癡
斷無清夢飛蓬島
剩有冥搜到草池
聞說郎星遭彗
又添一恨上雙眉

原注謂其主人曾宗丞也

和林養正龜符惠詩

殿陛程文被十行
要搜鯁論獻朝堂
點頭只欠饒三好
強項須教受一章
耿耿苦心增骯髒
茫茫俗眼笑荒唐
太官羊肉非吾美
一筋藜羹劣可嘗

賀洪景茂葉舍試平奏仍勉為南宮之行

鼓篋天庠正妙齡同時行輩半先登如今纔喜紅心中當

日幾成赤腳升

原注洪向來一舍試便居前列合赤腳升以無例不果

冀北羣空看走

馬溟南路闊快搏鵬歸來新敞渠渠屢笑我生涯冷似冰

萬仞浮屠已合尖出門一笑謝蘼鹽釣鰲滄海六連上

騎鶴揚州二得無識應何仙符舊兆夢魁余榜今新占

破荒吾邑須君輩更看花從錦上添

賀陳思表兄西上

原注正己連四解二遜其弟

誰言場屋似樗蒲好手居然不解輸
疊來三巡皆得注
結場一擲定成虛
月評須應狀元識
風義新添家慶圖
科第假途餘事耳
方來宇宙要人扶

賀陳講書謀仲誣璋慶

好是橙黃橘綠時
津津黃色上雙眉
子為良月陽將長
一索成男喜可知
南外原缺一字房開宅相西清荷索長孫

枝青春拾芥收科第
須記麟庠客有詩

賊平賀本路史倉良叔彌忠四首

實地從來著脚安
好脩繅蕙更紉蘭
貴游淡似孤寒士
達宦貧於初品官
醫國名方留肘後
憂民心事集眉端
浮榮過眼同歸盡
獨魯靈光耐久看

建俗輕生自古然
况逢軍旅更饑年
兩臺相顧長酸鼻
一飯無緣得下咽
發廩救荒寧計日
乞師請命屢牋天
賊平必欲論功報
鎮撫須居戰取先

六十青蚨米五升
兒童滿口說常平
方愁饑火無聊賴
一沐恩波得並生
真佛現身來救度
老天著眼自分明

從今閩粵家生子定把君侯姓作名

誨盜須知有自來貪官污吏禍之胎殺人于貨甘殘忍
入市拏金不忌猜誰與清朝申典憲合將若屬寘渠魁
書生銳欲排閭閻先誦民謠獻外臺

寄惠安吳簿明輔子良權南安宰二首

南安只是舊南安敏手為之便好看事辦要先心肯辦
才難須信縣無難錦遭傷後從新製琴不調時改舊彈
見說笑談理繁劇公餘何惜築詩壇

邑人見說漸相安更把西山作樣看有社有民行志易
不寬不猛得中難設施新法須明允掩蓋前愆莫糾彈
便作真王何用假安排旗鼓即齋壇

題惠安賴汝恭溪山風月亭

亭俯清漪揖翠岑好風吹面月盈襟濯纓孺子滄浪興
抱膝高人梁父吟流轉韶光蘭滿砌婆娑秋景桂成林
為君喚起棲梧鳳瑞旦來儀磬樂音

送真西山赴召

一朝三命下金鑒

原注時召曹彥約鄒應龍真德秀

獨有先生出處難

學術顏曾千載上行藏呂范二公間莫言一木難支厦
須向中流力障瀾愛助益為天下計丈夫心事頗相關

送吳魁君謀叔告赴召二首

三載天庭出一魁一魁豈是利名媒熙寧如葉庸人耳
南渡惟張君子哉臚唱若為調衆論囊封正要看人才
千年青史芬芳遠過眼浮榮付儻來

盛名之下最難居一節清忠自有餘豎鐵脊梁須我輩

橫金腰帶聽伊渠和戎自古迷當局善類何時可得與
抗論朝廷須正大莫如鄉黨費分踈

送徐茂功西上二首

有司具眼東時髦此士今纔入網羅好去南宮平步過
向來東閣閱才多孤忠獻畝常憂國大對軒墀莫主和
有問臞翁消息者官非不愛柰狂何

送傅一新西上

此去蘭宮好策勛子行真足張吾軍大鵬怒奮溟南翼

駿馬鳴驚冀北羣直要安排醫國策不徒戲作送窮文
逢人有問狂生者為說憂時已白紛

送朱典卿履常上舍西上

天庠教育總英游文行惟君擅兩優玉潤珠明盈咳唾
蘭薰雪白見操修老天不錯須開眼朱吏相逢定點頭
月裏一枝高斫處向來我已為君留

送張柔翁必強西上

說詩匡鼎筆如椽此去雲霄穩著鞭富貴恰當年五十

扶搖快上路三千乃翁積種今歸子是理乘除信有天
梅友面傳衣鉢好題名更向萬人前

送黃東起西上

我友君居德行科見君覺我汗顏多筆端有韻珠盈唾
胃次無塵玉不磨好去腰斤高斫桂向來傳鉢有持荷
廣寒管領羣仙到為我慇懃謝月娥

送林元質彬之西上

二十年來共短檠相親不減友于情風高鶚版曾雙中

海闊鵬搏不計程
宣力棘園新扁額
題詩梨嶺舊家聲
辦香旦旦為君祝
唾掌功名在此行

送陳君保作詰西征

非時何事欲西征
為有悲風動紫荆
斜斷最憐鴻鴈影
急難方見鵲鴝情
北方寒地多冰雪
南國飢甿弄甲兵
扶旄東歸良不易
護持孝友有神明

西征延平道中偶成

羣羽斜飛欲刺空
誰能剪翼向籠中
客程跋涉二千里

年紀侵尋五十翁，酒有神通排磊塊。
書無靈聖困英雄，相逢且說窮愁話。
纔入修門莫說窮。

送鄭秉叔西征

聯轡而西三十程，風餐雨宿費經營。
間關閱舊途經熟，老大逢新歷日驚。
我正與時相杳鑿，君方隨詔赴弓旌。
獨班賜第明年事，回首雲深谷口耕。

除夜宿江下逆旅呈甥陳宗器

在家隨俗坐守歲，逆旅無聊卧向晨。
舊隱荒涼棲鶴怨。

端門邂逅畫雞新知非
早似蘧伯玉將貴誰欺
朱買臣
幸自樽中留得酒與君
隨分慶長春

南劍倅趙用甫權郡有
小集以祈晴不用妓移
晚筵於潘司戶

君侯風誼薄雲高軫念
征夫跋涉勞雅宴朝陪
青玉案
餘歡晚屬念珠曹嚮來
驚下曾參予此去誰分
范叔袍
齋閣祈晴行有應免教
雪虐更風饕

和龍溪陳宰璉景賜石
馬橋韻橋乃其父崇清

作倡

幾年公案一朝成我覩爭先眼倍明勢面似呈新月樣
灘腰不作怒濤聲鰲頭地踞三千尺鵬路天開九萬程
荷橐辨香元好在陰功隱德慰平生

原注侍郎自言每
旦必焚香告天願

成此
緣

又九月朔同諸將觀石馬橋

萬年石馬勝緣成千丈金鰲跨水橫法從福田勤播種
小菴心匠自經營不緣打破工夫到那得中流砥柱平

我輩濟川真事業何時赤手活蒼生

因發諸縣催科行移口占呈東倅

共乘別駕犯炎雲入手文書費解紛
搜見底囊供北餽作無麪餅飽南軍
銅山欲乞從今賜金浦何為異昔聞
分得塵勞無著處不知風月幾時分

送黃同年京甫必昌赴廣西提幹二首

黃甫才名二十年蹉跎正坐不能圓
四書銳欲潛心聖八品甘為從事賢
東道樽前需客久南軒印子待人傳

丈夫不必求知已具眼分明有老天

君過羊城見菊坡先生不出意如何蜀噓淮沸人挺亂
京火郊雷天薦瘥石介不親逢慶歷龜山何策救宣和
狂生憂國頭如雪送客無悰作好歌

寄呈漳守李侍郎元善四首

原注李韶自號竹湖筠溪其祖也嘗

漳守

棠木筠溪手自栽竹湖又剖竹符來祖孫相望風流盛
父老驩傳春意回拔薤莫須施辣手泛蓮似更欠清才

善人所至如甘雨要洗漳民滿面埃

原注余去漳未久据所見言之

侍郎佛地位中人一飯何嘗不念民涇渭同流須有別
雪霜殺物乃為仁揚清可使貪夫愧去惡能令善者伸
自笑狂生太饒舌見詩少喜定多嗔

嚮來大姓虐窮閭千畝農田浚作渠黠吏鷹豪爭攫肉
驕兒螂怒敢當車老丞嫉惡無容忍直筆誅奸欲剪劬
解印此曹稱快甚惟民與士最愁予

原注驕兒謂李蒲軍

陞前苦語犯龍鱗朝退還遭丞相嗔連削六階為下吏

只饒一死與閒身
命天所付須安分
貧士之常莫語人
惟有梅花無冷暖
玉堂茅舍一般春

寄南劔守陳寺丞宿

復齋出守劔津時
正直清廉真吏師
遺愛昔嘗垂竹帛
徽音今又嗣墳簞
侯能培植甘棠發
我欲摩娑常萼碑
千載福公家傳好
懷哉蜀士送行詩

送黃殿講成父赴廣東漕四首

進退韻

閩州長者舊家聲
德厚流光產俊英
火玉精神充戶牖

國蘭譽諸播爐亭臨軒初試董晁策抗對專尋瀛洛盟
臚句一傳暗萬馬祥雲五色捧魁星

剡曲蓮池徹底清即馳雋軌上蓬瀛抽黃婉白羞時學
漬墨磨丹勘舊經彤陛奏言殫蓋直玉皇動色賞忠精
胸中列宿舒芒耀藜火光分太乙星

金華重席被恩榮蘭省還持多士衡善類適然相抵牾
諸公可是費調停自從陣脚一搖動堪嘆棋枰幾變更
紫帽清源人刮目朱幡炯炯見郎星

尺一催歸白玉京浮雲偏妬月華明鳳凰遠舉弋何慕
鷄鵠爭鳴草不馨館列翹才難致仕杖携靈壽莫扶傾
重瞳不見賈山久猶駕輶車作德星

嘲解十首

主聖時平諫諍無子胡不善效轅駒庸庸隨物例多福
皦皦出塵良易汙填海誰憐精衛苦移山可笑此翁愚
鳴鐘鼎食不知愛却愛山中飯糲簞

嘲

杞天之下夜長吁朝上封章肝膽剝自是諸公忌生語

不應聖主怒狂夫我將行禮教嫌簡子欲正名由笑迂
寧作首陽人餓死不為仗馬戀生芻

解

一相當朝總百官升沉只在笑談間及門炙手趨炎火
傾國將身靠泰山子獨何人蜉撼樹衆皆重足虎當關
仙舟已到蓬萊境却被波神勒取還

朝

孤士每蒙丞相嗔人心不泯是非真瓘為苦語攻姦蔡
銓出危言忤老秦此事古來曾有樣如今天下幾無人
西山夫子深窮理能以逢干作保身

解

邊塵四面逐雲飛正是英盧得志時西洛故疆將克復
北軍新銳屬羈縻智名功勇渠何欠跋扈飛揚子過疑
消得騰章來辨析臺臣慮惠可無詞嘲

狄青心不負朝廷跋扈人疑漸有萌琦不押班嬰衆怒

浚私鑄印被臺評鉅公未免憂清議之子如何諱此名

若使滿朝無一語晚唐藩鎮禍胎成

解原注余嘗有三跋扈辨

西山名節太崢嶸洪魏同時俱有聲斥去不妨為寶慶
出來亦只做端平事師如子何為諂植黨旁人笑好名

嫠女諫官良解事正邪辨析極分明

嘲

原注嫠李再劾以為不當諂事

真某交結

洪某魏某

三賢千載共襟期出處存亡同一時吾道非耶天詎測

斯人已矣我疇依希文若在甘為黨邪恕無知却背師

坐此褫官吾不恨恨他同傳是韓非

解

君臣大義等乾坤兄弟何曾係大倫齊霸分明誅子糾

唐宗決裂用讐臣向時諸老空饒舌何物狂生又犯鱗

一自蔣坡新語出斯知世有讀書人

嘲

原注蔣三劾以不當言濟王事

以齊威公殺子糾唐
太宗用王魏事為證

霸者成功如彼平孔門童子恥稱之盡倫大舜斯為至
有過周公不亦宜古者責難誠意切今人逢惡大經褒
若教新語宜垂世可廢八章棠棣詩

解

聚物

臧穀亡羊等是癡塞翁失馬浪成悲本非真鹿夢何準
未必無鰲釣且遲蛟龍暫與虬蛇肆鴻鵠那教燕雀知
暮四朝三狙莫怒會看挾乙走狐狸

--	--	--	--	--	--	--	--

欽定四庫全書

臞軒集卷十六

宋 王邁 撰

近體詩

和宗姪朝望公輔賀生朝韵

投閒久矣息心兵
臺上饑烏又一聲
湖海正須招隱士
朝廷終不赦狂生
剖開胸腹猶餘赤
削盡頭銜越樣清
坐看吾宗後來俊
西風再舉上鵬程

生朝止客

白髮蒼顏五十三北風不競又來南
宦情於我蠟來淡世味從渠蜜樣甘
烏哺劬勞恩未報鴈行淒斷痛何堪
記生縱有一樽酒忍與妻孥共醉酣

寄延平史君馬德大天驥二首

日誦江干餞別詩端平局面改嘉熙
調元金鼎人黃髮宣化朱轡君白眉
否泰從來更代禪乾坤此去願平夷
狂生迂濶真無用飽飯山中倒接籬

君正青春我鬢絲春闌舊夢是耶非
九方臯馬分明瘦

百里奚牛自在肥

原注德大善談相故云九方臯

欲去尋盟談繾綣又

愁鈎黨起幾微乘車戴笠俱隨分懷美人兮心奮飛

送趙伯泳涯侍郎守溫陵

趙公過莆以書復某曰西山兩典是邦遺愛至今
人思之故府必有可見子盍以語我來某謂清源
自南渡後有梅溪之王荅川之倪俱以從官出守
最後則吾西山先生兩出牧焉其再至則官侍從
矣王倪之政則聞而知之西山則見而知之今趙

公首以故府事實為問其有意於以曹隨為心乎
某敬以戒吏諭民一冊申呈而以二詩將之因憶
西山安奉倪公祠堂之文有秋菊寒泉配食之語
公如能因泉民之思倡此義舉和者必衆亦可以
慰西山疇昔之志謂余不信試以質之是邦諸寓
公當亦以為然

泉是梅溪遺愛鄉老倪復此種甘棠後來薦報西山政
歸去全無南物裝籍甚三賢皆法從勉哉一趙繼循良

萬安橋上傳佳話七十年間四侍郎

西山無物與泉民底使民如父母親凡日用間無不敬
滿腔子裏盡吾仁我熏知見香猶舊公滌中和印一新
願廣桐鄉依戀意寒泉秋菊祀千春

寄發倅張同年渭叟併簡其壻黃元輔自然二
首

江峯映帶武夷青幾度携筇此地行韻士魁人鍾間氣
冰翁玉壻並時名世方爭效十鑽巧渠自不貪三字榮

料得平章風月暇家書一閱萬金輕

同登當日鬢猶青宦路還如跛鼈行蒔藥山阿非貴相
叩頭殿下得狂名著書平屋千年記堆笏盈床一餉榮
安樂窩中無別法只將世累放教輕

呈竹軒張史君二首

竹軒治郡政成時却值王孫慶玉墀無吏下鄉民點塔
捐田入學士磨碑平反陰德堪娛母清白家風更課兒
見說元宵燈不放為他百姓惜膏脂

日晡齋閣響鈴條鞅掌文書尚坐曹吏困行移愁脫腕
侯勤剖決快揮毫維摩正為衆生病太守勝如從事勞
願養精神需大用款陪齊客醉醇醪

和竹軒張史君來字韻二首

金鳳傳呼紫馬來壺山真面氣佳哉朝天有路鹿呈瑞
應物無心鷗不猜黍稷熟時農洗甑芰荷香裏客啣杯
官穹職峻人俱羨最羨斑衣舞老萊

一自都門拂袖來閒中歲月亦悠哉填波精衛功良苦

享樂鷄鵠心自猜老矣力衰難運甓偶然興到且傳杯
君侯若使居王所片善還能采草萊

再用韻和張仁仲史君

五花入手眼增明合主黌宮善類盟善教牖民師帥責
婉辭玉女父兄情馬經定價增神駿鴉亦懷音避惡名
從此心田去稂莠沐侯化雨及時耕

用韻簡黃元輔二首

不愛螭頭一點青片言桷鑿拂衣行但憂負我平生學

豈願爭渠豎子名天駿出閑驚飽秣國蘭却佩艾敷榮
想君記得西山語佳士從來去就輕

髮今如此不重青醉後長歌折檻行老去一寒甘忍死
古來幾士得全名稻畦蔬圃閒中樂藥禁薇階膜外榮
所見畧同君與我不妨官小得人輕

山居即事

出處行藏不偶然何曾由我總由天收回紫陌紅塵足
來結青山綠水緣萬籟鳴時仍瀑布數鴉起處忽林煙

暮雲正爾商量雪却被催詩雨插先

秋夜對客

旋燒香鴨剔銀缸風捲銀蟾上矮窗詩癖苦無奇藥療
睡魔賴有建茶降回環蛙部疑成兩接續蟬笙不計雙
好友相看寧惜夜滿懷秋思浩如江

良月朔郊行問訊梅菊

夜半漸驚風作惡朝來賸喜月為良知梅有意商量雪
問菊何謀準備霜和靖未吟先得趣淵明欲斷已無腸

物情榮悴胡關我獨酌悠然寓醉鄉

山中讀誠齋詩

萬首七言千絕句九州四海一誠齋
肝腸定不餐煙火翰墨何曾著點埃
錦瑟月中彈不徹雲濤天上瀉將來
巴西社裏陳黃遠直下推渠作社魁

夜讀杜詩契心喜成

夜永如年眠較遲寒聲颺颺薄書幃
靜看香篆紫茶椀細嚼檳榔當酒卮
詩卷一開明病眼騷人千載契心期

偶逢會處點頭笑
早被燈花聖得知

除夕

憶昔都門值歲除
高樓張燭戲呼盧
久依淨社參尊宿
難向新豐認酒徒
天子未知工草賦
鄰人或倩寫桃符
寒宵別有窮生活
點勘離騷擁地爐

案此詩見後村千家詩今補入

枕上復用道間鄉字韻呈同人

爆竹聲中度歲忙
椒花杯上換春陽
欠書元日神荼帖
又看新年傀儡場
客枕方酣千里夢
朝靴正踏五更霜

主翁須要惺惺在富貴何如歸故鄉

元旦次日立春

年從爆火暗中移椒栢迎歡上酒卮今日天晴宜麥熟

明朝春到報花知好奇漫說雞千跣行樂都來黍一炊

但得新年詩有料不妨貧似去年時

案此詩見李伯璵文翰類選今補入

清明郊行

年例清明是暮春今年春事却平分故添一閨知天巧

欲探羣芳奈雨頻烟樹對人愁脉脉暮山似我老陳陳

感時莫灑花前淚不道中原漲戰塵

西軒春坐

容膝都盧屋一間圖書左右任披翻
催詩急雨來迢遞吹面涼風過等閒
生意無邊庭下草清香不斷畹中蘭
日長無事真僊隱作甚辛辛苦苦官

夏雨

彌旬不雨懶龍乖乾我茅齋一畝苔
火繖亭亭當午立雷車隱隱半天來
催詩笑我孤吟苦憂國愁眉八字開

池水甫能添幾許兒童已報可浮杯

案此詩見李伯璵
文翰類選今補入

送方德和大鋪赴漕

好風昨夜作秋天吹送雛鵝上紫煙慈母整裘顏有喜
難兄提鉢面相傳策勛胄榜特餘事努力巍科趁壯年
直數重陽到端午快聆三捷凱歌還

送方栻赴銓

笑提虹管試春闈大手何妨小出奇龍種嘶鳴暗萬馬
鹿麕辟易避孤羆京城紙貴爭傳賦便驛書來賸寄詩

老友生平識英物要看修竹拂雲枝

和劉編修潛夫讀近報蔣峴被逐二首

讀報欣然共賦詩古來忠佞各殊岐
彼猶愧見蔣穎叔君盍自期劉器之
惡草剪除雖一快芳蘭銷歇已多時
懷哉康節先生語作事莫教人綢眉

兩載相依笑陸沉鶉衣不羨錦為衾
渠儂眩耀麒麟植我輩翻騰騖驥吟
朝去一函憂稍歇邊留五大禍尤深
棟梁培植誰之責莫遣斧斤終日尋

簡南劔倅趙用甫以夫同年二首

原注時兼
招司機宜

元戎擇佐奏膚公君以宗英在選中紫氣發硯光射斗
碧油草檄令飛風莫嫌假手事權小行拜真王位望穹
老我相期猶遠大朱虛要立萬年功

岳亭邂逅又輕離時事更翻幾局碁游宦明知同旦過
出山聊復救朝饑屠龍笑我真何用躍馬追君已落遲
却有一般劣相肖蘭階晚始長瓊枝

和趙倅二首

一樣風清共月明
平分那得外斯盟
合將長與貳同傳
正恐君嫌譽過情
碑斷文昌須改制
臺高馬援却逃名
色絲黃絹儂無分
悔不文園着力耕

二車人物漢三明
來主壺山壽永盟
衆口是碑均詠德
片言如秤不容情
斯文陰有扶持力
循吏何求烜赫名
早晚政成天上去
舊廛還憶老農耕

呈趙倅

用進
退韻

別駕從來頭沓高
非關期奏壓宜教
推敲今日韓饒賈

引避他年藺下頗。螭欲當車觀者笑。駟難及舌罪焉逃。
小詩贖過無佳句。唐突西施又奈何。

再呈趙倅

委齋坐我以春風。不事拘攣邊幅中。俗子語言藏攫弇。
丈夫胷腹等崆峒。虛舟相觸何心在。怒火雖炎一餉空。
到底不如歸去好。扶犁戴笠作村翁。

作郡庠修學增田記成諸職事招飲

頻宮輪奐一鮮明。多謝賸侯主夏盟。雞白碑成慚淺識。

鵝黃酒滿認深情回頭二十三年夢接武千英萬俊名
來事可為待卿等狂生老去合歸耕

丹青閣

盛年憂國鬢毛蒼諫疏端堪銘豆觴行或使之苗膏雨
心乎愛矣藿傾陽榮華不與羣兒競名節須留千載長
試看丹青閣中句吾宗有此好元方

跋大庾令趙宗華時棣藏諸公帖

戊戌夏約漁溪林推希逸白杜方尉巖仲之泰州

載酒訪宗華酒半宗華出所藏帖數紙玩之程
元公歐陽文忠公蘇文忠公趙清獻公蔡忠惠公
張魏公皆兒童走卒識名氏者至他帖則指之曰

某賢者某不肖者某賢否之間者宗華曰吾並藏
之所以為賢者之師而不肖者之戒也余為之詩
數帖凡經幾世藏字漫黑暗欠裝潢孰賢孰否人千載
遺臭遺芳紙半張憤世疾邪成怒罵懷忠愛直轉淒涼

吾曹留面要相見莫使人能議短長

原注王梅溪云吾
曹離合不常要須

他日留
面相見

偶書警俗

大雅吾無望古人有常猶愈翟公門貪榮但可驕妻妾
死義方堪托子孫董生雞哺寧求報元子雉媒莫少恩
俗物茫茫隨野馬英雄千載赤心存

師心主人作飛錫巖

巖頭古佛留心印巖下高人新受持佛亦本來無隱現
人於悟處領希夷莫嫌夢裏還談夢且看竒中更有

奇他日證成羅漢果相逢不必問伊誰

聽九座鈍菴禪師端午日外堂說法詩

人在塵中醉玉蒲師於瓶裏瀉醍醐傳來雙徑清香遠
喚起叢林病骨蘇炳炳毫光爭日月琅琅舌本有江湖
他年泉下相逢處解得龍山舊事無

輓趙東巖簡叔彥侯四首

已矣東巖不慙遺年來雅道日陵夷臞儒得似顏徒幾
良吏能為結輩誰此老清修如玉屑當官懇惻念茅茨

可憐一夜長庚隕空使人懷殄瘁悲

建炎戎馬滿神京殿撰橫身活一城時宰忌功無表勸
老天福善自分明人稱簪紱一門盛公是瑛瑤間世生
珍重西山遺事跋他年收入史官評

夔州歸後聖於詩到墨池來字更奇嶽后前驅護丹竈
湘靈起舞聽朱徽經行一夢遊僊枕遺愛千年墮淚碑
俗物茫茫留不住化為遼鶴入雲飛

召節飛來湘水濱賤天乞取自由身懸知壽杖宜扶孔

縱有蒲輪莫致申老去最能堅晚節復來應信有全人
朱虛不作更生死誰為蒼生問大鈞

輓邱制幹二首

功名入手太匆匆匹馬沙場氣貫虹詩好可能却敵騎
檄工不自愈頭風死須厲賊言猶在生不封侯命果窮
四十九年蘧伯玉是非往事轉頭空

曾見端平進士評邱君磊落榜中英忘形爾汝同年集
馳志伊吾即日行舉子能談真將畧元戎誇得好門生

可憐書劍渾無用才力如何與命爭

輓漳守鄭都承子敬四首

饗相當朝舞大權故將旌節博金錢公嘗勇去三千石
天與閑居十六年清苦膏粱餘子笑孤高雲水一僧然
如何赤嶼丹霞地夜半騎鯨上紫煙

端平衆彥起彈冠公作樞庭第一官君似仁皇從諫易
相非莊敏汰兵難齊人一傳楚人衆趙氏幾危劉氏安
君面更新風色惡回思往事為懷酸

壺山閥閥例多賢
雪玉風標憶眼前
正獻風猷復齋繼
蜀公素業肯亭傳
人於故國悲諸老
我為吾州惜二僊
在昔靖康人物盡
却教老蔡雪垂肩

當日曾同鵷鷺羣
清漳風月又平分
輪囷肝膽憂時事
紉繹諸書洗吏氛
悔不佩韋成造次
幸猶掛劔答殷勤
隻雞斗酒來行酌
三十六灣生暮春

輓陳直學二首

領袖鄉庠四十年
被書誤得到華顛
玉川大用不及試

東野古心常自鞭抱疾二詩知命語遺骸一偈小乘禪

修文地下非公願生則當生兜率天

原注公病中二詩
臨歿一偈皆知道

之言

飽看布褐與軒裳識破都如夢一場失鹿蕉間空咄咄
騎鵬天上去堂堂命真不遇才何負人已無存德未忘
珍重騅甥歌挽些他年有淚灑檳榔

輓趙南塘尚書汝談二首

屈賈文章蚤善鳴長楊制誥晚尤精天僊一念墮塵世

屬籍千年誰老成
賀表明明規寶慶
諫箴字字砭端平
不堪耆舊凋零盡
淚到南塘覺盡傾

一自黃臺詠摘瓜
傷心吾道竟非耶
病來陶侃少獻替
老去謝安微誤差
萬里長江饒一曲
連城白壁略纖瑕
太玄草就無人識
付與知音弟子芭

輓武剛方錄參

世科赫奕登相續
官守端方石介如
如無節能開河內
廩進身耻覓帝城
書秩終九品人稱
屈善積千年慶有
餘

馬耳家聲無失墜二雛努力大門閭

輓致政朱司戶二首

枕上功名淚不乾鏡中勲業老猶看起家喜有千金子
入手纔沾九品官衮袞天朝來錫賚匆匆人事異悲歡
最憐當日稱觴處桂茂蘭芳萱草殘

一生鐵硯費磨鑽老去耽書廢食眠不惜空門求利果
只將心事博長年思賢已矣悲行路福善昭然有老天
他日兒孫須鼎貴燕山陰德賸流傳

輓鄒帥母葉夫人二首

詩書教子昔鄒母
燕喜寧親今魯侯
石窰疏封時陸續
魚軒迎養歲優游
精專十念湘山佛
髣髴三生閬苑儔
方擬繡輿扶上殿
不堪丹旆楚江頭

昨依綠水芙蓉幙
得傍華堂萱草陰
座末識裳裳眇異
羹餘分潁念恩深
巢廬正灑萊衣淚
傳驛俄驚楚些音
二母生榮雖迴別
天寒陟屺一般心

試五墨五首

雪齋凡數種此種出清漳或作西齋號南州許擅場
長沙游玩地多有墨工奇舊說胡光烈今誇鄭子儀
柯山葉茂實膠法頗精堅潘李今何處斯人得正傳
齊峯何處是似亦出柯山此是西山物研磨雙淚潛
墨上署臣字必曾經進來一年磨一寸須作墨中魁

暮春即事

雲頭紅上三竿日烟際青來數點峯桑柘熟時鳩喚雨
麥花黃後燕翻風

歸舟過桐江晚風不順

長江渺渺雨濛濛自在扁舟一葉中
欲識此行無可意往來俱被打頭風

丙子詔後需捷四絕

一面飛來打疊秋農場已築管無憂
吾儂種殖三年學未省書田還有收

促織牆陰唧唧吟早催衣褐上寒砧
砧聲似助蛩聲切勾引征夫萬里心

戰罷歸來月再盈
懸知得失繫心旌
應門稚子占蛛信
刺繡佳人聽鵲聲

勝負相持日已多
看棋人已爛僊柯
淮淝非久捷書到
還折門前屐齒磨

自贊善相

三分相士七分非
又似枯臞又似肥
好待功成名遂後
煩君只畫着蓑衣

畫工又作道裝

揚州節鉞非吾愛肯要腰纏十萬錢只願天公多與壽
道巾野服伴胎僊

贊彥廣兄喜相

數珠在手鹿隨身一笑陶陶滿面春天地知他心事好
百年饒與作閒人

送人紙筆

阿連詩語已通神玉版霜毫不厭珍老我簿書安用此
自應回施與青春

香山聞杜鵑

雲膚似膜千山暝
雨脚如麻四面飛
游子何曾動歸興
杜鵑故故喚人歸

山郭檢踏途中聞杜鵑

已成客裏清明過
更聽山深謝豹啼
衮衮春愁無處著
試拚一飲醉如泥

海棠

梅太清臞桃太肥
不濃不淡此花宜
何人筆下有香字

為杜陵翁補逸詩

菊花

忙裏何曾把酒卮，一秋心事付東籬。等閒應被西風笑，

寂寞黃花未有詩。

案此詩見李伯璵文翰類選今補入

元宵觀燈

元宵燈火出遊教，闔巧爭妍照綵鰲。官府只知行樂好，誰知點點是民膏。

和馬伯庸尚書四絕句

晴瀾金色漾琉璃
日落春風拍岸時
鷗鳥不驚人去遠
披垣南下樹參差

步障隨車起暗塵
畫羅難隔艷陽春
水邊爭羨春陽柳
一歲東風一歲新

玉泉山水潺潺不
比溫泉洗玉環
濯罷九龍池內錦
纔教流出到人間

絲絲垂柳拂金溝
學就宮娃舞態柔
莫遣落紅飄一點
長門春色不禁愁

觀風堂觀叢刻

古碑真贋遞相承
俗刻紛紛滿筍滕
最是可憐越山石
不應只弔剡溪藤

蓮花

蓮花出自淤泥中
過眼嫣然色即空
爭似泥塗隱君子
褐衣懷玉古人風

又送地栗螭蟬簡趙倅詩

鏤玉雕瓊釘餽中
盃行到手莫辭空
詩僊比作西湖藕

俎豆蘋蘩入國風

送荀荪與方德潤大琮右史仍求霜毫

玉版丰標清更臞紫姑道味頗甘腴
遣渠問訊紫薇老後省厨供有此無

狂吟不覺兔毫枯偶探囊中笑子虛
欲覓管城何處是中書君自有中書

監試衛通判送桂花一枝得四絕句以謝

花映眉間一點黃笑將文字共平章
高枝定不輕分付

自有花為知見香

天女吹香到酒邊不須更著水沉煙
明年正月披香殿人在玉皇香案前

君家結得此花緣盛事龍頭四十年
書種至今香不斷

馨兒俱作廣寒僊

原注貳車二子皆浙漕

風月堂中傾國姝別來風骨太清臞
良宵夢裏殷勤說

玉兔還能擣藥無

原注貳車自言有寵姬得疾院中合藥與之

參部至三山簡王宗教子文埜二首仍寄觀潮

拙藁子文舊詩名為碧雲樓集

昔艤歸舟傍淺沙逢君躍馬看梅花
匆匆相見還相別三十六灣天一涯

別來雙鬢忽驚秋一笑哦詩寬百憂
草舍繩樞聊爾爾如何比得碧雲樓

臘肉

霜蹄削玉慰饒涎却退腥葷不敢前
水飲一盂成軟飽隣翁當午息庖煙

問邵武守劉無競克遜求邵武紅硃三首

見說歸裝只載書書囊拍塞載紅硃不知滴露研磨剝
惠我刀圭點易無

閱君吟稿日頻哦句法金鎔字玉磋自是集中多好處
從頭點滴費朱多

自憐凡骨本難僊安得泥壇七返丹欲使身輕生羽翼
乞丹須是問劉安

讀王伯大都承奏疏

讀王幼學兩疏痛快大叫曰快哉快哉家人輩以
我為病風喪心而余不覺喜之至此極也滿飲一
白輒成十絕先呈吾友方德潤右史劉潛夫編修
且囑其和母曰吾畏禍愛官職不比狂生無藉賴
也

去非前日在端平我以為兄不敢名若使去非觀此疏

須饒幼學作難兄

原注王遂字去非
端平初第一臺諫

屢下絲綸喚不來來時已作去安排吾宗有此好兄弟

欲往從之天一涯

首疏明明點敗基次篇字字比元龜人中龍定子瞻是
殿上龍非安世誰

曳紫腰金滿闕庭被渠喚作集爪蠅適從何處來居此
面目人嫌鬼亦憎

金鑠難羈五色麟行藏如減國精神可憐張禹孔光輩
氣息奄奄泉下人

直道年來冷似菰西山去後有人扶王郎此段真奇特

又喜三山出介夫

原注此章再指三山言

佞夫苟賤糞甘嘗餘子危言襲故常若使秉彝猶未滅
也須泚頰細思量

朝犯雷霆暮即行竈間老婢莫猜驚須知堂裏釘頭肉
不似山中野菜羹

近得故人盈紙書却將取辱笑吾徒世間自有可羞事
曾見歐陽責范無

聒耳喧啾厭畢逋朝陽忍聽鳳凰孤朝廷若貶饒州老

我亦甘心拜尹洙

感歎時事

十家生聚九無聊
雞犬驚惶避使輶
昔日青苗猶出鏹
如今俵紙作青苗

聞說永平全盛時
如雲冠蓋會京師
新來逐客令嚴甚
肉食滿朝無李斯

贈無諍和尚四首

佛祖曾經幾罵訶
却稱無諍意云何
寒山拾得哈哈笑

更有人癡似汝麼

稽首叢林無諍師
因有諍落便宜問
師無諍中三昧
笑指巖前沒字碑

學道參禪空自忙
郭郎鮑老各郎當
不如卸取戲衫子
甘與人呼作啞羊

達摩西來長子孫
不徒無諍且無言
後來鼻孔撩天漢
有眼何嘗看世尊

詩餘

水調歌頭

壽黃殿講母

天上一燈滿引起萬燈明不知今夕何夕平地有蓬瀛
西母瑤池稱壽南守鋒車催覲二美一時并一點魁星
現長侍老人星心事好天與壽鬢長青不將鍾鼎為
樂念念在朝廷此母宜生此子須有醫時良策壽國福
蒼生子自坐黃閣母自課黃庭

沁園春

尹和靖宣政間不為權臣詘隱於洛中及兵起全家受禍老先生獨以身免賢者之不出如此楊龜山屢出不合又去未幾又出靖康之變以諫議大夫從駕入金營賔者之出竟如此謹詳二先生出處之節求質正於西山真先生遂成此詞以呈

人物眇然蒨蘭椒艾孰臭孰香昔尹公和靖與龜山老雖同名節却異行藏尹在當年深居養道親見兵戈興

洛陽楊雖出又何畀於蔡何救於章 公今為尹為楊
這一着須平心較量正南洲潢弄西淮鼎沸廷紳噤舌
舉國如狂招鶴亭前居然高卧許大乾坤誰主張公須
起要擎天一柱支架明堂

賀新郎

呈劉後村時自桂林被召到莆又遭煩言

出了羅浮洞有多情梅花雪片殷勤相送見說脩然琴
鶴外詩壓牛腰較重又管甚羣兒嘲弄嶺海三年持翠

節料無時不作家山夢馳王勒歸金鳳

原注金鳳池乃所居也

一門朱紫環昆仲看堦庭森森蘭玉慈顏歡動宰相時
來須着做且舞萊衣侍奉却不信大才難用時事多艱
人物少便中興誰辦浯溪頌更大廈要梁棟

前調

丁未守邵武宴同官

此是河清宴覺朝來薰風滿入生綃團扇太守愁眉才
一展且喜街頭米賤且莫管官租難辦遶砌苔錢無限

數更蓮池雨過珠零亂儘買得凌波面 家山樂事真
堪羨記年時荔支新熟荷筒齊勸底事來尋蕉鹿夢
贏得乾忙似箭笑富貴都如郵傳做了豐年還百姓便
尊鱸歸興催張翰看卿等上霄漢

前調

送趙伯泳侍郎守溫陵

憶昔同時召正青山親提玉尺量材廊廟當日班行比
元祐北玉西珠照耀一轉首宮商移調君自烏臺登騎

省覺精神風采增清峭數賢者一不肖
酒酣耳熱惟長嘯便翩翩輟班荷橐一麾
閩嶠堪笑狂生無用處垂老雲新月釣
這富貴非由人要疇昔評君如玉雪好
條然琴鶴風塵表清獻後又有趙

